

Makna Yesusmoa

Yesusva Nengthal Lohv, Sesoana Moalamangva Kuvuwulluhv.

Yon Baptaisva Seilva Sesoana Moamba Ishulprunna Indhanamba.

Matiu 3:1-12, Luk 3:1-9 eva 3:15-17, Yon 1:19-28

1 ¹Hona tombairava memba plalmomba lohvpa, Yesus Kristusna nemelmoa besalva seilva phona, noi Yesus Kristus Sesoana ombol.

²Nemetva Aisaiava moashulnindriniva novel vena os, Sesoava ombolm omnana, hello kam, yemba si kava kavna andram wolaihangavav, wo kavna moashulnindrinim si kava osva wolaihangavav, wo he miva gavav, yena monamba vuenghungavav.

Malakai 3:1 ³Wo doa hev si gavav, wo di indhanahuiram amana vevav, wo indhanam di nembraomana vevav, os mendekliva doa mura prolm vev. Yeoa monaoa vuenghimmivm, wo mendekliva beswonamba yeindamba si siheinvav. *Aisaia 40:3*

⁴Doa Aisaiava os doarava no Sesoana moamba novel vena, wo osva Yon Baptaisva sism wohengvna. Hev phonamba, di indhanahuiram amana vevna. Wo no Yonmba indhanam ishomana vivvna os, yeoa sahoklamoa wuleihu. Yimba osva vivrava, yemba kava os pona poswol vevav. Manara, yena sahoklava mindnam luhunv Sesoana novra, wo himba si os nomba yenamba maisasa vrinvav, hengava nengvavmoa.

⁵Wo Yutanind indkumbi, Yerusalem kembelnind indkumbi embauvmona vevna, Yonm di nonglapulvulvohvna, wo hena moamba hillivnamba, wo hevna indkoklamom moakus umnivna, wo Yon nomba pona poswol vivvna. Os vivna di Yotan pora. ⁶Yonna wevsava os, kayen vethulamana vevna, kayenmba nomba tatana talna vina, besalva owai. Wo innemba noi Yonmba naomana vevna sungeitinne, vevna meleumb, eva yuhvsu. Honi Yonna inne kayen os lohna, os Sesoana moashulnindva doarava os vivna.

⁷Wo Yon indhanam ishomana vinvna, os si mongova indhanariniva sis provav, wo kava hena anglasingi lohv. Kava indhanakola ambo, wo he kamba wohkuvhoavav. ⁸Kava yemba daipotava ponangas poswol vaomana vev, heva os hena andrava si mendekli phovav, wo hena moara Sesoasongolva yena nihmerava sihaomana vinvav. Doa yimba si os henanapopol wohaevvav.

Yon Baptaisva Yesusmba Pona Posvena.

Matiu 3:13-17, Luk 3:21-22

⁹Doa nonamba Yesusva hevnamini Nasaret kembellini venamba Galili provinsriniva, wo Yotan pora Yonm nonglapho, wo himba Yesusmba pona posvena. ¹⁰Wo Yesusva porini meillam vonganamba, doa os nonglana, ovrava mel lohvna, wo noshara Sesoasongol holope leumbna nihna, wo Yesusina avhoana. ¹¹Wo Yesusva Sesoam ovrini hellena, os yimba kana mongal ombol, yem kava mindnam indk vethamnav.

Setanmba Yesusmba Lehsambaihana.

Matiu 4:1-11, Luk 4:1-13

¹²Wo Yonmba Yesusmba pos vepianamba pona, doa lelnam Sesoasongol Yesusm wuhhona, indhanahuiram gawe. ¹³Wo noinda Yesusva indhanahuiram gana, wo simba 40pelara lohmanavna diva. Wo diva himba Setanm nonglapho, no Setanmba Sesoana ungesund. Wo himba Yesusm newondmona isholohmanavna. Yesusva di indhanahuiram amana vevna, di ten sungeitwindeva sahoklal luhungu vevnam, wo Sesoana ovsongolnind hembra kekalvho vrimnivna.

Yesusva Hevna Andramba Seilva Sihana.

Matiu 4:12-17, Luk 4:14-15

¹⁴Wo dawonam Herot kuwul Yonmba buira wolaihasihana, wo nonamba Yesusva Galili provinsram ganamba, di indhanam Sesoana nemelmom besalm isholohmana vinvna. ¹⁵Os ishunvna, daipotava men lehrava phov, manara noinda Sesoava indhanamba hevtindilm nembraomana vev. Wo noinda osva hengava manam yimba ningvav pevna indkoklamba. Owai, wuleihu, wo honi nemelmomoa kek vithivm, enguvmona vevm.

Yesus Kekaiv Vena 4Pelara Hevna Aonghal Mahalnindm.

Matiu 4:18-22, Luk 5:1-11

¹⁶Doa dawonam Yesusva Galiliplomb pethalmonam gavna, wo di nongalphona Simonim Endruim etel bosalalm. Nomba etel bosalalva doara tambko andra evelohvna dinasvom sovawolalm, wo nonamba tambkom pohlalawondana eselvnna. ¹⁷Wo Yesus unna, daipotangas yimba

tambko andrava evev, wo yimba si kamba ehengpetharava, indhanamba yimba si os nempaomana evevra Sesoatindilm. Pohlalawondaoa eplaho, kam ehengpetho. ¹⁸Wo noinda pohlalawondamba evalahavna, Yesusm ehengpetha, lohmana evevna hetindilm.

¹⁹Wo Yesusva mendah gavna, tendorini samblam nongalna Yemsim Yonim, Sepetina ombolsamblam. Hev pohlalawondam henga beswonam ehonavna botsra. ²⁰Wo Yesus unna, yeoa kam ehengpetho katindilm. Wo os evena, aralm, andranindm, himba sandhalaha epihonamba botrini, Yesusm ehengpetha.

Yesus Tihsongom Engvapiangamnana Indhanarinina Nihmerini.

Luk 4:31-37

²¹Wo wonganamba, Kapaniam kembella wonpho, wo no sapturam sembayangduvra wonsiha. Sapturava Yutanindva vah iaevluwul vevna hevna volm. Doa Yesusva di indhanam Sesoana moam ishomana vinvna. Ishunvnamba, ²²wo indhana hillivnamba, os uvna, pai, doarava katekiswa pimba osva moakus unvnamoa, osva Yesusva memba moakus ovpa. Yesusva nengthal lohv, wo aralna moalamangva kuvuwulluhv.

²³Wo Yesusva mendah ishunvna, doa mongova indhanariniva sembayangduvra sihana, indhanarinimba nomba tihsongo doara pothomnana, wo himba daikaka vevna. ²⁴Wo hev Yesusm mindnam omnana, Yesus, es yimba kamba ata venavav? Doa kava nonora, yimba Sesoanamini prona, besal yimba, wo ata kam humeis ye nihsesowolm venavm.

²⁵Tihsongomungilva os ishomnana, wo Yesusva tihsongom omnana, wuleihao, wohgao. ²⁶Doa tihsongova indhanarinimba nomba kusukul vrevna, mindnam kinge os ovna, doa tihsongova nihmeriniva os phona.

²⁷Wo indhana di sembayangduvra una, pai, mani hevpa manamoa memba? Yesusva besal lohv, wo hena moamba tihsongova hillivpa, wo os vivta. Snamba andrava pivva doarava nunglinamoa, owai. ²⁸Wo lelnam indkumbi moa wulaindahalv vevna di mongona kembella mongona kembella Galili provinsra.

Yesus Andra Velohmana Vevna Hevna Pethara Galili Provinsra.

Matu 8:14-17, Luk 4:38-44

²⁹Wo Yesusva sembayangdini phonamba, Simoni inam Endrui inam geinnamba, Yemsim Yonim domangas wongana. ³⁰Wo Simonna kolalva di doara devvra uvavulmungil nendawovna, nih vuvremnavna, wo Yesusm ishumne. ³¹Wo Yesusva devvra sihanamba, muram ga, doa englaval kleiha vre, wuleihapholm vevna. Wo uvavulva nomba os daipotangas wuleihana, wo ungevliriniva nomba beswonam lohmana vevna, wo innesowa vinvna.

³²Doa simba okilvravnamba, nomba deuvnindva uvavulmungilmba, tihsongo mungilmba mindnam nom tungiambv vevna no deuvram, Yesus di avnam, ³³wo indkumbi no deuvnindva di kusopra. ³⁴Wo Yesus vinvna, wo uvavulmungilmba nomba kanandhawol vevna, manamungil manamungil, wo tihsongova mindnam Yesus engilpingu vinvna no indhanana nihmeriniva. Tihsongova nomba Yesusna doa nonora lovahvna, os Sesoanamini prona, besal lohv. Wo noinda Yesus no tihsongomba ovunna, moamba wuleihu, manam yimba indhanamba osvav unvav.

³⁵Doa sia eunumbullam, mongova indhanamba mendah ninshavna, wo Yesus no deuvrini holopenamba hevho, indhanahuiram ganamba, di sembayang vavovna Sesoam. ³⁶Wo Simontatana sis engavulanga lingil lihanam, ³⁷wo Yesusm di yumna vlie, una Yesus, indkumbi yemba asulangalm vevna, yeoa hem wolapho vera.

³⁸Wo Yesus unna, owai, honaminiva mongona kembellam kava wongalm vev yemba, no kembella eva kava Sesoana nemelmom isholm geinv, memba kana andrava, hona andram kava pronata. ³⁹Wo Yesus isholohmana vevna mongona kembella mongona kembella di Galili provinsra. Wo di indakonda sembayangduvra himba indhanam wonamana ovovna, Sesoana nemelmom ishomana vinvna, wo tihsongom engilpingu vinvna indhanana nihmerini.

Yesus Mongo Lombamungilna Vosavam Kevrana.

Matiu 8:1-4, Luk 5:12-16

⁴⁰Wo di mongova lombamungilva pronamba, Yesusm mulumbdandna lohvhooamna, wo himba Yesusm osahmana, kana vosavam kevro, wo kana nihtov lesvhoara. Ata ye kevravavmi owaimi. ⁴¹Wo Yesus hem wavra vovhoamnanamba, wo engla holothomnanamba, omnana, tanamolnam ata kava yena vosavam kevravav, yena nihtovoa lesvhoara. ⁴²Wo Yesusva os ishomnavnamba, lombamba lelnam heniminiva selpevna, wo he beswonam pho.

⁴³Wo Yesus ongawolna, garava, manam yimba indhanamba ishuvav, osvav doa Yesus kamba sishona vrei. ⁴⁴Owai, ambo sembayangna andranindrini inam gao. Garava, innepetaoa guao, os Moses doara ten novol venam. Wo hemoa no innepetaoa vrahoo, Sesoam nonam okolalm. Wo sembayangna andranindrini yemba os ata naengho vrevav, doa lombamba yenamba wohselpei, wo indkumbi si os yemba nonora, yemba doa kanandhana. Doa lelnam gao. ⁴⁵Heva os owai, himba ganamba, moakus une, wo indhana indkumbi moa wulaindahalv vevna no kembella no kembella, wo noinda Yesusva es eva mongona kembellava sihavta, monamilla kulthoamnavnam, ka nunglivai. Noinda Yesusva monamilla ambo alohvna, wo di indhanamba heindam ambalvohvna, kana kinwondam nembashapiha vinu.

Yesus Mongom Monglakoklanam Wolaihaphona.

Matiu 9:1-8, Luk 5:17-26

2 ¹Wo henga Yesus Kapaniamra phona deuvra. Phonamba, doa indhanamba os hillina, wo noinda hevinda kusona. ²Kusonamba, wo deuvra kekel vithina, deuvra tuvra monara os kekel vithina. Wo osva Yesusva wonamana vevna, hevna besal nemelmom ishunna. ³Mendah ishunvna, wo indhanamba ambna, wo tendorinim wulimbna. Tendo samblasambla wulimbna towara. Nomba tendoriniva monglakoklana doara livna os. ⁴Wulimbna, doa Yesusindam wulsaiholm vevna, heva os owai, indhanamba kekel vithina. Doa volnamba, wivtam vevla vinamba, doa tendorinim no mella enesna towara piapove. Piapovvnamba, Yesus di deuvmera avnam.

⁵Wo himba os nongalnamba, wo nengna, hona tendomba kam ningminivna, ata sishona vrevav. Doa noinda himba no tendorinim os omnana, seh, indkoklava yenamba mekava poswol vei. ⁶Doa monglava katekiswa di hiluwuluwuvna, os ningminivna, Yesusva gekala ov, Sesoangas hev indkoklava poswol vinv indhananamba. ⁷Manam himba osva ov, osva sem Sesoamba opipahav.

⁸Doa Yesusva hev ambo lihawol vena, katekiswa kamba os ningminiv, wo noinda unna, manam yimba kamba osva ningminiv? ⁹⁻¹⁰Yimba os ningv, kava dasalm oi, kava tendorinim omni, indkoklava yenamba kava poswol vei. Hillu, kava ata henga tendorinimba omnavav, pho, deuvram gao, wo tendoriniva ata verava, kamba osva ata yimba lihevav, os kava dasalmba oimoa, kava tanamolnam hena indkoklava doa poswol vei. Manara, kava arana ombol lohv, he kamba moamba mendekliva kovorahona, wo noinda kava hona tendorinimba osva omnav.

Doa himba tendorinimba monglakoklanamba omnana, ¹¹yeoa phovm, monglana lohvhao, vuhesaloa deuvram guao. ¹²Doa tendorini phonamba, vuhesal vranamba, doa wulvoha hevna deuvram no indhanana novra. Wo indkumbi os uvna, pai, pai, es hevpa Sesoava vei. Doa noinda Sesoam okulivna, lehra, doarava kava osva nunglinamoa.

Yesus Omnana Matium, Yeoa Katindim Petheinu.

Matiu 9:9-13, Luk 5:27-32

¹³Wo Yesusva henga Galiliplomb pethalmonam ga, ganamba, wo indhana mindnam di kusomna. Kusomnavnamba, Yesus wonamana vevna, ishunna hevna nemelmom besalm. ¹⁴Ishopieinnamba, monam henga ga, Livaim nonglakoho, Livaiva nomba Alviusna ombol, wo himba kantorra mera avna, duangna andrava vawovna, di indhanamba hevna taeksva dembhasuv velvohvna. Doa Yesus phonamba, omnana, pro, kam engpetho katindilm. Doa Livai phonamba, hevna andrava wuleihavna, Yesusm wohengpetha.

¹⁵Wo venamba, dawonam Livaiva Yesus hetindim inne wonnena. Wo nonamba Yesusva indhanamba mindnam wonnawovna, taeksdi dombnindm, puehálnindm, manara, sna indhanamba mindnam doarava Yesusmba tellohmana vevna.

¹⁶Wo Yesus wonnevna, mongova katekiswa os nunglul lovahvna, himba os lovahvna Varisinindilm. Doa himba Yesustindim osihinvna, es hevpa Yesusva osva vev, os honam taeksnindm puehálnindm wonnawov? Owai, osva sahoklal. ¹⁷Wo ona ishune, Yesus hellowole, wo hev henga olhmona unna, os mantriva uvavulnindmangas obatva dahwol vaomana vev, besalnindmba owai. Wo osva kava prov, monglava indhanamba ningvra kava indhanakokla, wo kava no indhanamba das owol vev. Wo monglava indhanamba ningvra kava besal, wo no indhanamba owai.

Yesus Olhmona Unna, Kana Moamba Nemelangas.

Matiu 9:14-17, Luk 5:33-39

¹⁸Doa Yon Baptaistatana monglava Varisinind, honi indhana innemba lovahavna, os ningvna, sembayangna wevsa os kava engiv. Doa mongova indhanamba Yesusm osihminivna, os Yontatanamba, katekiswa innemba lovahavna, heva os yena hellelnindva osva lovahavnamoa, manara? ¹⁹Doa Yesus henga olhmona unna, tendoriniva ongamba vravrava, hetindiva uvav, lehra vrav, wo owai, innemba nonamba lovahavnamoa, beswonam hlawuvav. ²⁰Kava mendah hui hona pethara lohvna, katindiva innemba lovahavnamoa, heva os si kamba ungundiva engvapingivav, wo osva katindiva kamba und vewuvav, wo noinda innemba si lovahavav kanasirava.

²¹Doa Yesusva mongo olhmona unna, os hillu, deupva nemelva yimba dimbrirava, deuvta manam yimba kololva dumbvav. Yimba osva virava, deupva lelnam pilpevav. ²²Wo manam yimba kolakoklarava kovav yesva, nemella ko. Kolakoklava ata humeis powalvm, wo yesva shara vetvaral vevav. Kana moamba yessowamsna, wo katekisnamba wevsava kolakoklamsna, wo mongawulmba elohvmoa, owai, ata powalvav.

Yesus Unna, Kava Nengthal Lohv, Osm Indhanam Kava Ishunvra Mani Vivav Sapturava.

Matiu 12:1-8, Luk 6:1-5

²³Wo sapturava Yesusva hev wonga osohovmonam, wo ponda angavna, wo hev innepeta momnanam dombolangavna, hilluwul angavna.

²⁴Wo Varisinindva di lovahvna, nongalvohvna, hev Yesusm kueisvina, yetindiva esm detiva sapturava viv. Osva himba witmovpa englanamba temba nenoh vewol vivpa. Kava ui, andra viv sapturava, wo Sesoana moamba himba osva sahokla vriv.

²⁵Wo Yesus hev ona, owai, yimba doa tombaira nunglina, wo doa yimba nonora, nemetva Devitva simbehumunilliniva os vena. Heva

os yimba mendah plalmba tit viv. ²⁶Ponmba vinvnamba, doa Devitva sembayangduvra siha, roti noi ne, ten Sesoana novra nalohvnam, nomba rotiva os uvna, manam ombandhanamba hlavav, hev noi sembayang andranindangas hlav. Heva os Devitva vena nemetva, doa he moang vinnata rotiva. Nonam vena, Apiatar nonamba sembayang andranindna kuwulva wulluhunvna.

Yimba nonora, Devit sembayangduvna wevsamba osva engvnamoa, heva os yimba memba kamba kueisvivna, yimba saptuna wevsava engvmoa. Manara noinda yimba mendah levrapivolvmoa, Sesoava os nengvna, wo tomonalmba indthueinna saptuna wevsam, sembayangduvna wevsam. ²⁷Sesoava seilva indhanam vewol vena, wo dawonam unna, detioa sapturaoa vah iaevulo. Himba nengnamoa, osva indhanamba pueilmera kava wolasiha vevav, owai, himba kolvrowolalm beswonam vevna. ²⁸Kava arana ombol lohv, osm kav indhanam kava ishunvra, mani ata detiva vivav sapturava.

Sapturava Yesus Englakoklanam Sishona Vrena.

Matiu 12:9-14, Luk 6:6-11

3 ¹Wo sapturava Yesusva henga sembayangduvra sihanamba, pai, indhanariniva englakoklanamba men av. ²Wo Varisinind di muskonam nunglul aevulvna, ata Yesusva es vevav, ata englakoklanamba sishona vrevavmi? Wo pi nunglirava, ishulanga, Yesusva sapturava andra vei, Mosesna moamba himba pilpiakohai. ³Doa Yesusva englakoklanamba omnana, phorava, hui mura lohvhao indhanana novra. ⁴Doa nom Varisinindm sah owol ve, es hevpa Mosesna pina tomonalnamba moamba es novol velohv? Detiva sapturava kava beswonam vevmi, ora kava sahonam vev? Kava hona indhanarinimba sishona vrevavmi, ora kava nombalvhoavav? Wo Varisinindva moanghui aevulvna.

⁵Doa Yesus hem muskonam nungsis vungo, duus vevna, yimba undva sahoklal, yimba wavra vovhueimnivmoa hona englamungilmba. Doa Yesus omnana, englaoa yeoa shuavm, wo shuanamba, doa beswonam wohlohmanavna. ⁶Wo noinda nomba Varisinindva pulvonamba, anga, Herot kuwultatanam ishulanginna. Kusonamba, hev poaita unna, es hevpa pimba Yesusva si vinivav? Doa hev una, si helvakomandhivav. Hena monana pimba si helvakomandhivav?

Yesusva Uvavulmungilmba Mindnam Sishona Vewol Vena.

Luk 6:17-19

⁷⁻¹⁰Ungundva osva poaitava uvnamba, wo noinda Yesus hevtindim wonga, Galiliplombra wonpho, wo indhanamba mindnam kusona, doa Yesus wolapho vevna. Galili provinsnind kusona, wo eva oklanind mindnam, ten doara hillinamba, Yesus os mendekliandra vev.

Os Yutia provinsnind, Yerusalem kotanind, Itumeanind, Yotanpora hilnind, Tair kotanind, Saiton kotanind, indkumbi noi engalla kekel vithie, ambo Yesusm lukul vruwul vevna, os ningvna, Yesusm ka ambo tuhivrava, ata kamba lesvhoawol vevav. Wo Yesusva hevtindim unna, ata humeis kamba singtheivav, bot vreu, ata kava botra vongarava, avhoa posra. ¹¹Wo nomba tihsongomungilva Yesusm nunglivnamba, doa pethara dalvna Yesusina, os Yesusm mindnam umnivnamba, yimba Sesoana ombol. ¹²Doa Yesusva no tihsongom ongowolna, manam yimba kamba osva muserava sevravriv, yimba he.

Yesusva Hevna Moalamangnindm 12Pelara Puvund Vena.

Matiu 10:1-4, Luk 6:12-16

¹³Doa Yesusva Galilipundrini indhanahuiram vonganamba, hevtindiva sis engvolnamba, Yesusna moara. ¹⁴Doa lumbulla kusonamba, Yesusva tendomba 12pelara puvund vena nominiva, unna, yimba kana moalamangnind lovahv, yemba kava boasna wonamana vevav, doa si kava yem wolanga vevav, kana moam ishuvmona velm. ¹⁵Wo yemba kava si os poaouthowol vevav, wo noinda tihsongomungilmba yimba si beswonam wolapulvo vewuvmona vevra. ¹⁶Doa boasna Simonm puvundthoanamba, awona, yimba Pita lohv.

¹⁷Yemsm Yonm etel bosalalm Sepetina ombolsamblam puvundthoawolna, awowolna, yimba holaiklana ombolsambla, doara yimba indvuvral elohvna. ¹⁸Wo mongom himba puvund vena, Endrum, Pilipm, Bartolomium, Matium, Tomasm, Yemsm temba Alviusna ombol, wo eva Tatium. Wo Simonmba himba puvundthoana, Simonmba nomba indva wulluhvna, os Romduangmoa engilpingilvohara pivna Yutanindna petharinioa. ¹⁹Wo Yutas Iskariotm puvundthoana, noi Yesustindilm dawonam lohvna, wo sewonamba henoi si Yesusva ungun dna englirava desvhueinvav.

Katekiswa Yesusm Umnina, Yimba Sahoklal, Yimba Setanna Andra Vev.

Matiu 12:24-32, Luk 11:14-23 eva 12:10

²⁰Doa Yesustatana deuvram anga, wo henga kembelnind mindnam ksunna, Yesusna moam ka hillivai, wo noinda Yesustatanava innemba hlahuiva vevna. ²¹Wo moamba prona, wo Yesusna aval boasalal himba os hillina hevindava, os hevm ishunna, Yesusva innemba nehui vev, dihi daikaka ov?. Wo noinda Yesusindam hevnamini anga, waiembalm henga.

²²Doa mongla katekis Yerusalemrini holvorol vena, wo ishuvmona vevna, os unna, tihsongona kuwul Setan sihamnavpa, wo Yesusva nonapopol andra vev, tihsongomba wolanga vev. ²³Wo Yesus hev hellenamba, indhanam unna, ambtok. Ambanamba, henga Yesus olhmona unna, os katekiswa nomba unna, tihsongona kuwul Setan kam

sihamnavpa, wo henapopol kava noinda tihsongova wolanga vaomana vinv indhanana nihmeriniva. Osva owai, owamba kava wolanga vetava, beswonamba kava aevulvavmoa, indkokla vilovav. ²⁴Hev unna, mongona pethanindva avra, wo daos oho hevm, wo heva os muhavav, avavmoa. ²⁵Wo mongawa kembelnind avra, wo daos oho hevm, wo heva os muhavav, avavmoa.

²⁶Wo Setanmba hevna owalmba wolanga vetava, beswonamba aevulvavmoa, indkokla vilovav. ²⁷Himba kam sihamnavmoa, owai, kava doa Setanmba wena ningena, wo noinda hena andrava kava sahokla vringu venav, hena tihsongova kava wolanga vaomana vev.

²⁸Doa tanam kava yem ishuv, indhanamba indkoklava vivra, wo Sesoana nihilva sahokla ovrivra, nomba hena indkoklava Sesoava si poswol vewol vinvra. ²⁹Heva os indhanamba Sesoasongolmba sahokla ovrivra, nomba poswol vinvramoa, hena indkoklava si wohluhunvra.

Yesusva noinda osv a unna, manara noinda himba Sesoasongolnapopol andra vaomana vevna, heva os katekismba nomba Sesoasongolmba sahokla ovrivra, ³⁰himba gekala uvna, Yesusva Setannapopol andra vaomana vev.

Yesusva Unna, Anmund Kana Ovalva Lovahv?

Matiu 12:46-50, Luk 8:19-21

³¹Wo Yesusva mendah deuvmera avna, indhanam mindnam wonavna, wo hevna avalna boasalalna muram ambna, ambanamba, ambara lovahmanavna, wo unna, Yesus photok. ³²Wo mongova indhanamba hilwulnamba, noi ten deuvmera kusovnam, doa Yesusm umne, nongaltok, ten avapevtatanamba yenamba amballa lovahv, yem umniv, photok.

³³⁻³⁵Doa Yesus unna, an kana ovalva eva lovahv? Himba nomba Sesoana moamba hillipva, wo enguvmona vevpa, himba nomba kana avalmsna, kana boasalalmsna kana muskovolmsna. Wo Yesus nungsis vungo indhanam ten kusonam, unna, memba yimba eva aevulvpa, kana avalmsna kana boasalalmsnata.

Yesus Olhmona Unna, Monglava Indhanamba Sesoana Moamba Kek Vithiv, Monglava Owai.

Matiu 13:1-9, Luk 8:4-8

4 ¹Wo Yesusva Galili plombpethalla henga indhanam ishomana vinvna di. Wo indhana mindnam henga di kusopramna, engalla kekel vethapra, wo noinda Yesusva botra vonganamba, avhoa. Avhoanamba, nominiva kihhe, wo indhanamba engalla kusona, ²wo Yesusva hevm ishomana vinvna, olhmona unvna os, ³yeoa hillivm. Mongova indhanariniva osoram gavna, witmovm kokovelm gavna. ⁴Himba nomba koko vengavnamba, monglava monara poksra dalvna, wo tuawa ambna, hlapia.

⁵Wo monglava dalvna di pethara, nomba pethava honsra ambo dasalm lohvna, wo noinda lelnam phovna, ⁶wo okombava suwelva lovhoavnamba, witva nomba soulawol vevna, plalva pipiha vevnamoa.

⁷Wo monglava witmovpa pethara dalvna, no pethava ilsasva mera lohvna, wo nomba il wunithavna, wo nihilva endvnamoa. ⁸Wo monglava witmovpa petha besallava dalvnamba, wo nomba beswonam phovna, wo nihilva mindnam endvna. Mongova 30pelara endvna mongawatillava, wo mongova 60pelara endvna mongawatillava, wo mongova 100pelara endvna mongawatillava. ⁹Honi olhmoa kanamba yimba hillivra, heva os aongo keknam elepewolvra.

Yesusva Manaram Olhmomba Ishona?

Matiu 13:10-17, Luk 8:9-10

¹⁰Doa nomba indkumbiva bukethavnamba, doa hevho Yesusm sahminie, no ¹²pelara indhana, nom hev ten pusvund venam, eva mongla ombandhana, noi Yesusm engvulvahmana vevnam. Hev Yesusm sahminie, es hevpa honamba yenamba olhmonamba plalva lohv? ¹¹Wo Yesus henga unna, plalmomba doarava poaita lohvna, men daipotangas ka yemba moakus unv, os Sesoa daipotava hevtindimba nembraomana vev, os yeoa pevna sahaposwomoa maivithivm. Heva os nomba indhanamba temba bukethavpa, himba Sesoamba undnahonamba ningminivmoa, noinda kava moakus unimoa, kava olhmonangas uni.

¹²Doara mongo Sesoana moashulnindriniva nonora avna, ona, si os phovav sewonamba, wo os novol vena,

Indhanamba si hiluvmona verava, si nungluvmona vevra, heva os owai, si beswonamba nunglivavmoa, si beswonamba levrapivolvavmoa, si humeis himba hevna indkoklamba wuleihivm, wo Sesoava hena indkoklamba poswol vinvra.

Aisaia 6:9-10

Wo Yesus henga unna, moamba honamba doa yimba tombaira nunglina, wo daipotava indhanamba hona moamba wohengiv.

Yesusva Hevtindim Plalmom Ishunvna.

Matiu 13:18-23, Luk 8:11-15

¹³Doa Yesus unna, yimba kamba umni, olhmomba yenamba kava tit viv. Doa es eva yimba mongova kanamba olhmomba si beswonamba levrapivolvav? ¹⁴Wo hillu, yemba kava men plalmomba ishuny, indhanariniva nomba witmovm osora koko vengavna, wo plalmomba honanamba os lohv, mongo indhanariniva Sesoana moamba ishomana vinv. ¹⁵Wo witmovpa monglava monara dalna poksra, wo tuawa hlapia. Wo plalmomba honanamba os lohv, mongova indhanamba Sesoana

moamba hillivnamba, wo Setan hev lelnam provpa, wo maikumi vewol ve, wo noinda himba Sesoana moamba maivithie.

¹⁶Wo witmovpa monglava pethara koko venamba, no pethava honsra dasalm lohv, wo plalmomba honanamba os lohv, mongova indhanamba Sesoana moamba hillivnamba, lelnam indk vithivna, ¹⁷heva os moamba kek vithivnamoa, ambo sesmomowanam kleihalohvna, wo dawonam mongo sahoklava nonglaphotava, mongova indhanamba hembra os nungeilvrava, doa Sesoana moamba hilliv, wo noinda sahokla vri, wo noinda himba Sesoana moamba undsasa vrvav.

¹⁸Wo witmovpa monglava pethara dalna, no pethava ilsasva mera lohvna, wo plalmomba honanamba os lohv, mongova indhanamba Sesoana moamba hillivnamba, ¹⁹wo sismba himba hevna petharamba nengeuvmona vevna andramba, wo os ningvna, heva kava diandra vivav, wohtowond lovahe, wo nomba nengavnangva ilmsna wunithavna, wo himba Sesoana moamba engivavmoa. ²⁰Wo witmovpa monglava petha besalla dalna, wo plalmomba honanamba os lohv, mongova indhanamba Sesoana moamba hillivna, wohkek vithivna, wo himba Sesoana andrava vewuvmona vevna, wo hena andrava inne nihilmsna endungu vinvna, monglava 30pelara, monglava 60pelara, monglava 100pelara.

Yesus Olhmona Unna, Katindiva Woklamsna Lovahv.

Luk 8:16-18

²¹⁻²²Wo Yesus henga unna, mana emamba daipotava komandhul avrava, si ambarangas dembrivav, wo mana emamba daipotava ehlaya wulaevrava, si musera vilihevav. Doa noinda yimba wokla lavrvivava, yimba manam tekilava komandhivav. Owai osvva, ambara lavraholothu, wo noinda indhanamba beswonam nokambara novvivra. ²³Himba nomba kana moamba beswonamba hiluvmona velm vevrava, heva os aongoa keknam elepewolvra.

²⁴Moamoa kanaoa yeoa hillivm, kek vithivm. Wo yimba indhanamba es hevpa lesvhoawol velm vivrava, ora mindnam, ora espeta, Sesoa heva hev yemba nongalvav, wo hev yemba lesvhoawol vevav, ora snal. ²⁵Heva os yeoa aongoa lelahapravm, wo himba nomba moamba kanamba hiluwulvahvrava, Sesoava hembra os mongmomba mumushhoa vrvav, wo himba nomba moamba kanamba espetambo hiluwulvahvrava, Sesoava moamba nomba si wohposwol vinvav.

Yesus Olhmona Unna, Sesoana Nemeltindiva Seilva

Eskand, Heva Hev Ambo Mindnam Si Phovav.

²⁶Wo Yesus unna, katindiva os phov. Mongova indhanarini innemsna osora pethara tekoko vei, ²⁷wo simba mindnamba andra vungaiava, veiva, nil wulphungu ve, doa indhanarini nomba nengi, es hevpa phoi?

²⁸Owai, pethanapopol phoi, doa nil wulpho, wo si verava, lile, wo nihilva si endvav. ²⁹Si aembul verava, doa pueite, wenokombo vevavmoa. Doa Sesoana nemeltindiva os phovav.

Yesus Olhmona Unna, Sesoana Nemeltindiva Seilva Eskand.

Matiu 13:31-35, Luk 13:18-19

³⁰Wo Yesus unna, es kava yemba hengava ishunvav, Sesoana nemeltindiva si os mindnam aevulvav, wo es kava yemba hengava olhmona ishunvav noindamba? ³¹Nengara, Sesoana nemeltindiva mastatkulmsna. Kulva nomba eusikandal, ³²heva os indhanarini kukuvungu verava osora, phorava, innemba kuvhoangu ve, wo klalva mendekli kulvuhanga vevav, doa tuawava lamba di thiwulsihavra wusivilla. Doa Sesoana nemeltindiva si os mindnam aevulvav.

³³Doa noinda Yesusva olhmongas vena mindnamba, os hev ten ishunnam. Wo indhana beswonamba hiluwulvahvrava, doa hengava Yesusva nomba ishunvra. ³⁴Doa olhmongas Yesusva vena, wo hevtindimangas himba plalmomba velokusa vinvna.

Yesus Vuvim Ovomnana, Wuleiho.

Matiu 8:23-27, Luk 8:22-25

³⁵Wo nomba simba kilvravnamba, Yesus hevnam unna, botra pimba ata no plompethallam angavav. ³⁶Wo indhana mendah di engalla lovahvna, hevtindi botra aevulthana, te Yesus mendah avnam, wo wonga. Wo monglava indhanamba hevna botsra avhoangana. ³⁷Wo mendah wongavna, vuvi mendekli vena, wo ombokva mendekli vevna, botrava sihavna, wo botra pilivhoalm vevna, ³⁸wo Yesusva di omolsis livna, kuva wangtomra holothuwulvna, yihalna olvna. Wo hevtindi dehue, umnina, guru, photok, pimba pilipihalm vev botva, wo ata pimba nepola vilovav, wo yimba kamba ninginvmoa.

³⁹Doa Yesus pho, vuvim ovomnana, wuleiho, wo ombokm omnana, yeoa eva wuleihaota. Doa noinda vuviva wuleihana, wo ombokva eva wuleihanata, wo pomba beswonam livna, wo botva beswonam gavna. ⁴⁰Doa Yesus henga unna, es hevpa yimba pemba vivna? Yimba osvva ningvnamoa, hev kamba wongav, kam beswonam kekalvho vewol vungav. ⁴¹Wo noinda himba una, pai, es hevpa vei, wo hevm ishue, sumbho, vuviva ombokva hena moamba hillivna, wo wuleihe. Wo noinda pem vivna Yesusnapenamba.

Yesus Tihsongom Wolapho Vena Daikakamungilna Nihmerini.

Matiu 8:28-34, Luk 8:26-39

5 ¹Doa Yesustatanamba nohalm pulvo, Gerasanindna pethara di pulvona. ²Wo botrini wonholopenamba engalla, wo mongova

indhanariniva phona. No indhanariniva tihsongomungilva, wo noinda dai omana vevna, ³wo indhanahura limana vevna pokamahulsra. Dai omana vevna, wo indhanamba eva es kekel vivta, owai. ⁴Wenamba englamonglava indhanamba henamba ningewol velvohmanavna, heva os owai. Indhanamba indkumbim eva pingokoho vaomana vevnata, wemba nomba himba bilvhanga vaomana vevna.

⁵Wo okombanam sinim di pokamahulsra eva olora weingona lohmana ovovna, hevm honsra pusungu vevna aiv. ⁶Wo himba Yesusm nonglangu venamba, Yesusva ten botra prov, wo Yesus holopenamba, doa daikakamungil lelnam promnanamba, mulumbdandna lohvhomna Yesusinda murapeta, ⁷doa Yesusm mindnam omnana, Yesus, yimba Sesoa mendeklina ombol, es ata yimba kamba venavav? Sesoana novra men kava yem ishomnav, manam yimba kamba ata nihsesowolm venavav.

⁸⁻⁹Doa Yesus tihm omnana, tihva nomba no daikakamungilna nihmera avna, omnana pevm sevro nihilm. Wo tih una, Mindnam, manara kava mindnam aevv. Doa Yesus tihm unna, yimba sahoklal vilov, nihmerini pulvo. ¹⁰Doa daikakamungilva Yesusm mindnam ishomnana, tihva honamba manam yimba oklava wolanga vevav kanaminiva, owai.

¹¹Wo monglava deuvmotovpa mura di olopethalla ki hlalvohvna, ¹²wo Yesus no tihm wolanga velm vevna, tihva wenamona una, kamoia wolanga veo, nom deuvmotovm mera saivoe, ¹³doa Yesus unna, wouta. Doa tihva indhanarinimini pulvonamba, nom deuvmotovra sihangu vena, doa noinda no deuvmotovpa olora vitivoalla, lomosis peivvna plombram, wo wusprowol venamba, wohdalna. Nomba deuvmotovpa eva notongopetamma, 2000pelara lovahvna.

¹⁴Doa nomba indhanamba miemba dahwol vinamba, nomba lelnam gapiana, deuvkembelnindm ishulanginna, deuvnindm monanindm. Wo indkumbi nonglalm embanamba, es hevpa vine. ¹⁵Doa Yesusm nonglapulvona, wo indhanarinim nom nunglina, ten doara dai omana vevnam, wo malona beswonam av, beswonam men nengavnang vavov. Doa noinda indkumbi nunglivnamba, pem vinivna Yesusnapenam. ¹⁶Wo nomba indhanamba doara miemba dahwol vevuvnamba, noi osva no kembelnindmiba ishunna, Yesusva os vini. Yesus daikakamungilmba wolaihaphona, wo tihsongova henaminiva meinda sihapieinnamba, noinda miemba nomba dalna. ¹⁷Doa noinda no indhana Yesusm opholihina, ai kanaminioa geinu.

¹⁸Doa Yesusva nomini botra vongo, wo no indhanarini mura pronamba, ten doara Yesusva selvhoapipahamnam. Hev ona, Yesus, pioa engai, yei kava mongawulm ahamana velm vev. ¹⁹Doa Yesus omnana, owai, deuvram gao, sehpevm os ishongeinu, Sesoava kamba wavra vovhoamni, wo noinda kanamba selvhoapipahai, wo kava beswonam lohv daipotava. ²⁰Doa himba noinda os vena, ganamba,

mongona kembella mongona kembella di Dekapolisnahalm, wo nom ishungeinna, Yesusva kamba doa sishona vrena. Wo nomba indhanamba hillivnamba, os uvna, pai, es hevpa vevna.

**Yesusva Nengthal Lohvna, Osm Uvavulmungilm, Indhanamindilm
Wolapho Velm.**

Matiu 9:18-26, Luk 8:40-56

²¹Doa Yesustatana nomini botra wongavna, henga mongnahalm wonpho, wo Yesus botrini petharam holopenamba, engalla lohvena, wo indhana mindnam di Yesusinda kusoprana. ²²Wo mongo tendorini pronamba, no tendoriniva mendekli lohvena Yutanindna sembayangnindna, nihilva Yairus. Pronamba, Yesusm pethara lithamnavna novlomossis, ²³osm vevna, Yesusm mindnam osahmanavna, omnana, momba kanamba doa indnakra vev. Pro, engla holothomno, ata noinda uvavulva wuleihavav, wo ata beswonam avav. Tahonmba henamba 12pelara lohmanana. ²⁴Wo Yesusva pethamna, wo ombandhanamba mindnam eva mongawulm gapiavna, mi sis nihanasis sihanasis.

²⁵Wo Yesusi Yairusi mendah monam engavna, mongova ungevlinirini mura provna, nomba ungevlinirinimba wosepul kovhoavna, tahonmba 12pelara vena. ²⁶Wo no ungevliniriniva diva doarava aiwo vohavna obatrava mantrimba, esvemawus esvema tahon himba dembrahowovna obatramba, heva os demutrava wuleihavnamao, ambo nihva hevnamao aiv wohgavna. ²⁷⁻²⁸Wo no ungevliniriniva doara hellenamba, Yesusva os andra vev, doa nengvna, ambo ata eva kava Yesusna malom tuhrama, wo kamba kanandhavav. Wo Yesusva mendah monam gavna, ombandhanamba pelkleihamnavna, doa no ungevliniriniva sis pethamna, Yesusna malom tuhmana englana, ²⁹wo tovolva wohkik vena, wo hevnm nonglana, kamba doa kanandhai.

³⁰Doa Yesusva nungi lilnam os nengvna, an kana meississongolpetava kenga vrei, wo meissis umharavhoa, ona, an kanamba malova tuhi? ³¹Wo hevtindi umnina, snallava esm yimba owol vev? Pev nongalo, indhanamba mindnam maim ambo alalapat vev. ³²Wo Yesusva mendah ona novvungu vena, an kamba tuhi?

³³Wo ungevliniriniva nomba pem eisungu vevna, wo Yesusinda muram prona, mulumbdandna lohvhova, doa Yesusm moakus omana, kamba wosepul kovhoao mana vevnamba, noinda yemba kava tuhi. ³⁴Wo Yesus omnana, yimba os nengi, Yesus kanamba ata selvhoapipahavav, wo noinda yimba kamba tuhi, wo noinda yimba beswonam av. Doa beswonam gao, doa yenamba kik vei tovolva.

³⁵Yesus mendah no ungevlinirinim ishomnavna, wo monglava indhana Yairusna deuvrini ambanamba, Yairusm umnina, doa mopevmba

dahai, manam yimba ombamba Yesusm waiprovvav. ³⁶Doa Yesusva hena moamba hillinna, doa Yairusm omnana, manam yimba duus vevav honindava, ambo kam keknam nengmanavm. Ata kava yemba beswonam vemnavav. ³⁷Wo Yesus ongowolna, manam indkumbiva yimba prapiavav, Pita Yems Yon yengas ambo. Yemsi Yoni etel boasalal.

³⁸Wo wonganamba, Yairusna devvra wonpho. Doa Yesus os nongalna, indhana mindnam di wuo ovna. ³⁹Wo devvra siha, os unna, manam hevpa yimba wuo ov? Momba honamba dahaimoa, ambo dawonam ninliv. ⁴⁰Himba olhmona ishuvna, wo no indhana los umnina, gekala ov, doa wohdahai, ata hengava snamba es phovav? Wo Yesus nomba indhanamba engalungu ve, unna, phopiao. Wo araravalm Yemsm Yonm Pitam honamangas hevho wonsiha no devvra, otolm ten vindilvnam.

⁴¹Doa Yesus nom otolmindilm englaval okivra, hevna moana omnana, talita kum, osm omnavna, mo pho. ⁴²Doa no mutundisrinimba mindilva henga phona, beswonam lohmana vena. Doa no indhanamba devvmera di nunglutithueivnamba, os uvna, pai, pai, es hevpa vei? ⁴³Wo Yesus araravalm unna, inne endaho, wo manam yimba ishuvmona vinvav indhanamba, ova Yesusva os vena, aembu.

Yesusna Owalva Hembra Vreipra Vrivna Muskonam.

Matiu 13:53-58, Luk 4:16-30

6 ¹Wo Yesus nomini ganamba, hevna kembellam Nasaret kembellam gana. Wo hevtindiva sis engpithina. ²Wo sapturava Yesus sembayangdevvra siha di hevna kembella, wo indhana di kusovna, wo Yesus di wonamana vevna, Sesoana moamba ishomana vinvna, doa indkumbi umnina, pai, nonorangas lohv. ³Himba ambo andranindrini lohvna, Mariana ombol, wo hena boasalalva lovahv, Yems, Yosep, Yutas, Simon, wo eva muskovolva men euvmonav. An dihi hembra ishomnana, wo himba noinda nonorava lohv? An dihi hembra omnana, wo noinda himba mendekliandrava vaomana vev, indhanamba wolapho vaomana vev? Doa noinda duus vimnivna, moamba hillimnivnamao.

⁴Wo Yesusva hena moamba nonora, doa hem olhmona ishuvna, os mongova Sesoana moashulnindrini oklamba garava, wo Sesoana moam dim ishomana vinvra no okla kembelnindm, himba os umnivav, nonorangas lohv, moamoa hillimni. Doa no moashulnindrini henga hevindamba prorava, wo Sesoana moamba ora owalmba ishunda, no owalva os umnivav, ombandhana olohv, plohvra.

⁵⁻⁶Wo nonamba Yesusva os tungundthoawolalm vevna no devvnindmba hevna owalmba, heva os owai, himba Yesusmba undnahonam lovahthamnavnamao, wo noinda es eva tungundthoawol vevav ombamba, owai. Uvavulnindm eskand ambo himba hevna englava huhlinvna, wo os momongo wolapho vevna. Himba nengvna, kamba undnahonam lovahthamnavmoa.

Wo Nasaretnindva owalva os vina, wo Yesus hev mongona kembella mongona kembella os lohmana vevna, Sesoana nemelmom ishollohmana vinvna.

Yesusva Hevna Aonghal Mahalnindm Wolanga Vena, Andra Velm.

Matiu 10:5-15, Luk 9:1-6

⁷Doa himba hevna hellelnindm 12pelaram unna, hom kuso, wo kusonamba, unna, yem ka poaouthowol vei, wo noinda yimba angarava, yimba si os tihsongova indhanaminiva wolapho vaomana vinvav, yem ka poaouthowol vei. ⁸Innemba manam yimba iangavav, innemba, innewondava, diva mindnam. ⁹Spatuangas vewol viu, kayen vethowol viu mongasal, wo ala pepavu.

¹⁰Hanoi samblindhana engavra, hanoi samblindhana engavra, os ango. Anguwul verava, mongona kembellava yimba nomba ephovrava, di mongawaduvra dawonam wohihillohvm, inne enevm, verava, henga yimba mongona kembellamba engavrava. ¹¹Wo mongona kembelnindva yemba sehmonamba holvorombol owai ovitava, doa nominioa engavra, wo monara pethaslehol spaturini bumb vewol eveo no indhanana novra, osm himba ningvra, kava sahonam viv, hona Sesoana moamba kava aongpa viv.

¹²Doa no 12pelara hellelnindva himba anguwul vena, no kembellam no kembellam anguwul vena, wo kembelnindm woneuvmona vevna, Sesoana nemelmoa besal ishuvmona vinvna. Os ishuvmona vinvna, yeoa sahoklamoa wuleihu. ¹³Doa himba tihsongova mindnam indhanana nihmerini wolapho vewuvmona vevna, wo uvavulmungilva himba welna selvowol vaomana vinvna, wo lesvhoawol vi.

Herot Kuwulna Moara Yon Baptaismba Helvakomandhina.

Matiu 4:1-12, Luk 3:19-20 eva 9:7-9

¹⁴Yesusna hellelnindva os mendekliandra vivna, wo indkumbi hillivna, os uvna, Yesusva os vev. Monglava uvna, Yesusva Yon Baptais, ten doara dahanam, no pokamarini phona hevna nihna, noinda osva mendekliandrava vewol vev. ¹⁵Doa monglava indhanamba uvna, owai, Yesusva Elaita, Sesoana moashulnindrini, ten doara heva amana vevnam, doa henga beswonam phona. Wo monglava indhanamba uvna, owai, Yesusva mongova Sesoana moashulnindrini, ten doara euvmona venam pina simbehumunilmongo, doa henga beswonam phona.

¹⁶Wo Herot kuwul hev hellenamba, Yesusva os andra vev, doa hev ona, Yesusva Yon Baptais, ten doara kav wohtvnam, wo kuwul kovheimninam buimera. Henga himba pokamarini beswonam phona hevna nihna.

¹⁷⁻¹⁸Wo honamba Herotna moana, plalva seilva os lohmanana. Yon Baptaisva mendah beswonam lohvna, he Herotm kuwulm

ononglowomana vevna, os doa yimba sahokla vena Sesoana novra, etehevna Pilipna ongalva doa yimba pelvrana. ¹⁹⁻²⁰Wo no Herotna ongal Herotias doa himba wuspromnavna, Yonm helvakomandhalm vevna. Heva os owai, Herotva monglam hevna valgonindm unna, angarava, Yonm buiram waiango, wena ningu. Herotva os nengvna, Yonmba Sesoana andranindrini besal lohv, wo himba Yonmba beswonam buirangas dawonam dahowovna. Doa himba sambla und verombvna Yonna Sesoamom. Hev indnahonam hellellohvna, doa heva os himba hevmba duus velohvna Sesoanapenam.

²¹Doa sism alowoh vethana, wo Yonmba helvakomandhalva, Herotiasva vevnamba, seilva os vena. Mendah Yonmba buira livna, wo Herot inne indkumbim dahwol vevna. Nomba innemba nom ona hlavna, ten aval hevmba nonam lengnam. Wo nonamba kuwulm nembraomana vena, valgonindna kuwulm, hevna andranindna kuwulm, wo deuvkembelnindna mendeklim no Galili provinsnindnam. ²²Doa Herotiasna mol pronamba, sangalna oindalohvna no indkumbi kuwulna novra, wo os una, pai, besal hevmba. Wo Herot beswonam avna, no mutundisrinim omnana, doa yimba beswonam oindalohi, yemba kava ata mana emamba vraohvav. Pev orava, mani ata yemba kava vraohvav? ²³Kava gekalava ovmoa, yemba kava tanamolnam omnav Sesoana novra, mani mani mani yemba kava os dembrahowovav, eva mana emamba mendekliya yemba kava vrahangas vevra.

²⁴Wo mutundisrini nomba avalm Herotiasm sehgvana, os manam kava ata Herotmba omnavav, kam doa omni, pev orava, mani ata yemba kava vraohvav? Doa Herotias omnana, os ishomno, Yon Baptaisna kuwul kovhoao. ²⁵Wo nungi lelnam mutundisriniva ganamba, Herotm ishomnana, kava osm ov, Yon Baptaisna kuwulua kuvulambo pirinda, ka nonglalm vev daipotangas.

²⁶Herot hellenamba, duus vevna, heva os hev doa musera omni mutundisrinim, es hengava eva kava ovovav. ²⁷Wo lelnam hevna valgonindrini wuleihanganamba, Yonna kuwul kovhoaka di buimera. Venamba, henga prona, ²⁸Yonna kuwul pirinda kovopethana, mutundisrinim vraohna, wo mutundisrini avalinam kuvunga, nethamna. ²⁹Doa Yonna hellelnindva buiduvram anganamba, Yonna nihil vindilhalvonamba, singvi. Doa honamba plalmomba os lohv, Yonmba helvakomandhivnamba.

**Yesus Inne Pavmong Vinna, Osm Mindnam Phona, Wo Os Dahwol Vena
Indhanam 5000Pelaram Indpetamma.
Matiu 14:13-21, Luk 9:10-17, Yon 6:1-13**

³⁰Wo Yesusna hellelnindva 12pelarava mendah anguwul vevna andram. Vevnamba, henga Yesusindam kusopho ve, wo Yesusm

moa ishumnina, hev ten indhanam Sesoamoa ishuvmona vinvnam, selvhoapipaha vaomana vinvnam kinwondam. ³¹ Wo nonamba indhana mindnam Yesusindam kusonamba, osm honi pim tungundthoawol ve, wo noinda innemba Yesustatana indwonamba hlalvohvnamoa. Doa Yesus hevtindim unna, pioa dem angai indhanahuiram, wo dawonam di eha vawovav. ³² Wo noinda botra wonvongo, dem wonga, hev ten wonishonam. ³³ Wo mendah pomonam angavna, indhana mindnam no kembelnind no kembelnind di engalla luhungu vevnam, nongalvohvna, ona ten wongav. Wo noinda hesna engalmonam lelnam gapia, dom Yesus ten wongavnam.

³⁴ Wo Yesusva di botrini wonholopevna, nomba indhanamba di doara ksulvna. Wo Yesusva nongalvna, nengvna, os wavro, hona indhanamba sipsipmsna aevulv, no sipsipmba aralva dahwol vevmoa beswonamba. Sahonam aevulv, wo noinda kamba tellohmana vev, Sesoana moam hillilm. Wo noinda Yesusva hem wonamana vevna, Sesoana nemelmomba ishomana vinvna mindnam. ³⁵ Wo okombava vohavnamba, hevtindi Yesusm ishumnina, huiva innemba nalohvmoa, wo si ata kilvrvav, ³⁶ no indhanamoa wolanga veo, wo mongo kembellam dom angara, wo innem di sovawol vira hevm.

³⁷ Doa Yesus hev unna, pev hemoa inneoa dahwol viu. Wo hevtindi una, pai, diva esvemava heni kava dumbvav, wo nona innemba sovawol virava, wo hona indhanamba dahwol vi, owai. ³⁸ Wo henga Yesus sah owol ve, es yimba innemba pivnamba temba ieivv, nungsis vituk. Doa nunglinamba, henga una, rotiva pinamba limara aiv nunguluhunv, vei tambkova sambla. ³⁹ Wo Yesus unna, indhanam unu avhoaprara pethara smosra. Monglaoa indanam aevulthavra, monglaoa indanam aevulthavra.

⁴⁰ Wo noinda aevulthanamba, monglava 100pelara, monglava 50pelara, os avhoangu vevna, mindnam. ⁴¹ Doa Yesus no roti tambko dombnamba, wo nov vevongovna, wo Sesoam sembayang venavna, yimba besal, lehra yimba vei. Venamba, rotiva popowol vinna hevna hellelnindm, unna, moang vinu indhanam. Doa tambkova eva os venata, indkumbim moang vinna. ⁴²⁻⁴⁴ Doa indkumbi hlanamba, emba pilivhoangu vinna. No tendomba temba Yesusva dahwol venamba eva indpetamma 5000pelara, wo eva ungevlitundism es eva sevel viv? Doa hev os vina, hlawol loh venamba, eunumbulva pinge. Wo Yesus unna hevna hellelnindm, eunumbuloa henga nooa dembunu. Doa 12pelara wondamba nomba innemungilva nunguwul vina, pilivhoawol vi.

Yesus Plombsra Monglana Gavna.

Matiu 14:22-33, Yon 6:16-21

⁴⁵ Wo Yesus hevtindim unna, yeoa botra vongopiao, nohalm plombnahalm yesna ango, Betsaita kembellam ango. Unnamba, ⁴⁶ doa no

kembelnindm unna, pevna deuvram beswonam anguwul veo. Venamba, hevpa hevhoiva lumbullam indhanahuiram vonganamba, di Sesoam sembayang vaomanavna.

⁴⁷Doa si kilvrvnamba, hevtindiva mendah plombhovmonam angavna, botva wulangavna, ⁴⁸wo hev nongalga velohvna, vuvikoklara botva sahavrevna, angalmba. Doa si indulnam Yesus sis engilgavna, plombsra monglana ambo gavna. Murava nongalphovnamba, kuelwolalm vevna, ⁴⁹⁻⁵⁰hevtindi di onunglina, sumbho temba provmi, wo pem mindnam daikaka ovuvna. Wo lelnam Yesus ovunna, manapenam yimba uv, memba ka prov, indwonam aevu. ⁵¹Wo himba botra engalvungo, doa noinda vuvi wuleihavnamba. Wo henga nengavnang vevuvna, pai, es hevpa osvva vev? ⁵²Tit vivna, himba Yesusmba levrapivolvnamoa. Yesusva no rotiva tambkova espetava hena novra pavmong vinna, osm mindnam phona, heva os owai, mendah himba levrapivolvnamoa Yesusmba, ora snal lohv.

Yesusva Uvavulmungilmba Mindnam Sishona Vewol Vena.

Matiu 14:34-36

⁵³Doa plombmonam os wongavna, pethara pulvonamba, Genesaret pethara pulvona, wo botva engalla vilihevna, ⁵⁴wo botriniva wonvenamba, wo indhanamba no kembelnindva di nunglutithueina, os Yesusva hevpa teprov, ⁵⁵doa lelnam kembellam anguwul venamba, uvavulmungilm towara aiemb vevna Yesusindam. Doa Yesus mongona kembella mongona kembella os lohmana vevna no pethara. Wo indhana uvna, Yesus no kembellam doa gai, wo indhana hillivna, wo uvavulmungilmba os no kembellam tungiangavna. ⁵⁶Yesusva os lohmana vevna kembella, kota mendeklira, wo indhana uvavulmungilmba towara aiemb vevna museram monaram. Wo Yesus mura gavna, no uvavulmungilva Yesusm osihminivna, ambo ka yena kayenmulm ambo tuhi, doa himba nomba tuhvnamba, himba nomba lesvhoawol vevna.

Yesus Unna, Sesoana Moa Simbelnamba Moamba Wohkuvhoawol Vev.

Matiu 15:1-9

7 ¹⁻⁴Wo Varisinind, katekis Yerusalemrini ambanamba, Yesusina kusona. Nonindva himba simbehumunilna moamba wulaevvna, wo mindnam ninginvna, os uvna, innemba yimba manam hlavav, yimba englava poswol vehui vivrava mindnamba. Maketrava yimba sovawol vevrava, wo hengava yimba deuvramba iprovra, boasna mindnam pora dalohavrava, inneoa os nevm. Wo mongona moamba os una, moko pirinioa sospanoa no innesowarinioa mindnam poswol vivm. Wo eva pevna ninvhomoa poswol vivm. Wo hona simbehumunnamba wevsava henamba os luhunvna mindnam, wo Yutanindva mindnam engivna os.

⁵Doa no indhanamba Yesusm nonglapulvo, wo os ishumnina, yetatanamba osva vivmoa, kava memba vivpa, himba englava poswol vivmoa mindnamba, owai, innemba ambo nis hlav, wo noinda pivna simbehumunna wevsava maisasa vriv. Es hevpa himba osva viv? Sahokla viv Sesoana novrava. ⁶Doa Yesus hev unna, yimba gekala uv, yimba sambla indna vilov. Yimba simbehumunna moamba vriv, os yimba uv, kava Sesoana moamba memba vriv. Heva os owai, undnahonamba yimba Sesoamba lovahthamnavmoa. Tanam Aisaia doara novol vena yena wevsanamba, wo os he novol vena,

Sesoa osva ona, hona indhanamba kamba okuliv moana, heva os owai, undnahonamba kamba lovahthamnavmoa. ⁷Himba ombam kamba ambo dasalm sembayang viniv, himba simbehumunilna wevsana vivna, himba uvna, memba Sesoana wevsana pimba viv, heva os owai. *Aisaia 29:13*

⁸Doa Yesus henga unna, Sesoana moamba yimba ahnam piengiv, wo simbepevna moa wulaevv. ⁹Yimba os ningv, beswonam kava viv, heva os owai, sahoklal. Yimba osva viv, yimba Sesoana moamba wuleihiv, simbehumunna wulaevv. ¹⁰Moses doara Sesoana moamba novol vena os, Yeoa arapevna moamoa hillinvm, wo nesmos ambo vewol vivm.

Mongova yeriniva himba nomba araravalmba tandwolva vevrava, wo yeoa henomoa eva perkarra wonvivm, wo helvakomo wohvivm *Kisim Bek 20:12 eva 21:17*

¹¹Sesoa os unna, heva os yimba pev indamona ishunv, os beswonam indhanariniva araravalmba ovunvra, yem ka beswonam nesmos vewol velm vev, heva os owai, kava korpanna wevsa vena, wo noinda diva kanamba Sesoamangas nalohmanav, yem kava nesmos vewol vevavmoa nonamba. ¹²Yimba indhanamba osva numhowol vivpa, wo eva himba noinda Sesoana moamba ahnam piengiv, araravalmba beswonamba nesmos vewol vivmoa. ¹³Simbehumunilna wevsana yimba osva numhowol vivpa, wo noinda indhanamba Sesoana moamba ahnam piengiv. Memba wevsa sahoklal yimba viv, wo mendah sahoklalva mindnam yenamba luhunv snal men.

Yesus Unna, Yena Nengavnangngas Yimba Indkokla

Viv, Innerava Owai.

Matiu 15:10-20

¹⁴Wo Yesus ombandhanam henga unna, indkumbi kusotok, kam hillu, wo pisuvu. ¹⁵⁻¹⁶Yimba os ningvma, kava honatongo innemba hlavrava, wo noinda kana indkoklava si osva lohvav Sesoana novra? Yimba os ningvma? Owai osva, yimba es eva sahonam vivavma innerava, owai, pevna nengavnangngas yimba sahoklava viv, wo noinda Sesoana novra yena indkoklava luhunv.

¹⁷Wo Yesustatanamba nominiva wonvenamba, wo mongona deuvra wonsiha. Wo wonavhoanamba, doa hevtindi umnina, hona moamba plalva es hevpa lohv? ¹⁸Wo Yesus unna, yimba os tit vivma, ten mongona indhanamba tit vivm? Mendah yimba os ningvma, honatongo innemba kava hlavrava, wo noinda kava sahoklalva lovahvav Sesoana novra? ¹⁹Owai, innemba yenamba undrava sihavmoa, osmba indkoklal lohmanara, owai, innemba ambo yenamba eramba sihav, doa henga di kakusra. Wo Yesusva himba osva ovunnamoa, mongova innemba manam yimba hlavav, owai, innemba besalngas.

²⁰Wo henga ishongeinvna, pevna nengavnangna yimba ambo Sesoana novra sahokla viv. ²¹Nengavnangva sahoklal indhanamba vewuvmona vev, os goariskui viv, yukov viv, indhanam helvakomo viv, ²²muemb viv wohm, ungevlim, moangakala ovri, kelsombovho viv, tandmoa ishuv, besalmba moamba hillivmoa. ²³Sesoa hev hona sahoklava nongalv, indhana hevna nengavnangna ambo viv, wo noinda himba sahoklalva lovahv Sesoana novrava.

Ungundongorini Yesusm Undnahonam Nengmanavna.

Matiu 15:21-28

²⁴Doa Yesusva nominiva wonganamba, wo Tair kotara wonphona. Phonamba, mongona deuvra wonsiha di, os nengvna, manam ombandhana mendalm kusovma, kavtindim kava wonishomana velm vev. Heva os owai, es eva ata wonkithata, indhanana novsra wonamana vevna. ²⁵⁻²⁶Wo mongova no kembella di avna Ponisia ongoriniva, Yutanindriniva owai. Himba Siria petharini, wo hena moamba Grikna moamba. Wo no ungevlinrininamba molva, tihva doara nonglana. Doa aval hev os hellena, Yesusva di mongona deuvra amana vev, wo hev Yesusindam lelnam ga. Ganamba, Yesusinda di vendapi, osm vevna, Yesusangas mendekliva lohv. Vendapenamba, doa Yesusm osahmana mindnam, kana molnamini tihsongom wolaihangamno.

²⁷Doa Yesus olhmona ambo dembhamnana, manam kava otolna innemba dembringa vinvav windemba, osva owai. Boasna kava otolm innemba dahwol vevav, pilivhoawol ve. Osm ovna, boasna kava Yutanindmsna tungundthoawol vepiarava, wo yemba mongnindmba mendah dawonam. ²⁸Doa himba ona, tanam yimba ovta, heva os monglava windemba inneslehol ambo hlavol vev, noi otol ten pethara dembrapuv vevm lomungillini.

²⁹Wo Yesusva omnana, lehra yimba osva ovta, wo ye os ishoiva, wo noinda doa kava mopevnamba tihsongova wolaihangai, deuvram mopevindam gao. ³⁰Doa hev ganamba, molm di nonglaphona, beswonam av, nin ambo liv, wo tihsongova doa wohgamni.

Yesus Mongom Indhanarinim Aonghohal Vewol Venana.

³¹Wo Yesus nomini Tairrinimba wonga, wo Saitonda wonkohanamba, mongo pethara wonkohanamba, no pethava os ningthiv Dekapolis.

Doa Galiliplombra wonpho, ³²wo indhana di waiambna anguminam. Angumina, heva os ishovnamao beswonam moamba. Waipulvonamba, Yesusm umnina engla holothomno hona indhanarinim, noinda lesvhoara.

³³Wo Yesus anguminam dem oklapetam waingana indhanahuiram, doa englapundna angoval tuhowolmana. Doa hevna englapundm limbenenamba, doa angumina mindem tuhe. ³⁴Doa ovm nonglavongo vevnamba, kinda wusprovnamba, os nengvna, kava kavm kinwonda kethav hona anguminindrinina. Doa anguminam hev omnana hevna moana, epata, osm temba omnava, mengna aongnaoa yenaoa pasapo vera.

³⁵Osoa venana, wo beswonam helwolvna, wo mindemba henga kikih promnana, moa beswonam ishovna. ³⁶Doa Yesusva indkumbim ongowole, manam yimba osva ishuwul anguwul vevav, os Yesusva vei, owai. Heva os owai, moamba os wulvahmana vena, wo Yesusva eva mindnam ongowolvna, indhanamba henga mindnam ishuwul anguwul vevna. ³⁷Wo indkumbi no moamba hillivnamba, una, pai, besalanges, Yesusva mani mani mani vewol vev. Seilva angumi vevna, wo daipotava beswonam helwolv, moahuiva, eva nomba henga moa ishuv.

**Yesus Innepeta Pavmong Vinna, Mindnam Phona, Wo Os Indhanamba
4000pelara Dahwol Vena.**

Matiu 15:32-39

8 ¹⁻²Wenokombowonamba owai, indhanamba mindnam lelnam Yesusina kusonamba, Yesusna moam hellelm vevna. Wo Yesus hevtindim unna, kusotok, no indhanam kava wavra vovhueinv, manara noinda sambla mongonin pimund doa aevvna, wo daipota innelui. ³Wo pondava kava hengava wolanga verava hevna kembellam, monglava ata ponda daikaka velangavav, manara mongova monamba murama. ⁴Wo Yesusm hevtindi umnina, huiva osomba lohvmoa, heni pimba ata no indhanamba dahwol vivav, owai? ⁵Wo himba osihinna, es yimba innemba ieivv? Wo hev una, 7pela rotiva kava ieivv.

⁶Wo Yesus indkumbim indhanam nom unna, hui pethasra avhoapro. Wo roti no 7pelara dombnamba, wo Sesoam os ishovongo ovomnana, lehra yimba kamba dembrahuni. Doa englana popowol venamba, hevtindim unna, moang viwul vinu indhanam, wo osva vina. ⁷Tambkopetava eva Yesusm dembrehunamba, wo Yesus henga Sesoam os ishovongo ovomna, besal, doa henga unna, moang viwul vinu, wo osva vina.

⁸⁻⁹Wo hlanamba, doa emba pilivhoangu vina, wo no indhanamba eva indpetamma, hui 4000pelara lohvena. Wo nomba innemungilva hetindiva henga wondara nunguna, wondamba nomba 7pelarava pilivhoawol vena. Doa indhanamba nokra Yesusva unna, doa deuvram pevindam gapiangu

veo. ¹⁰Doa nonamba lelnam Yesusva nominiva botra wonvongana hevtindimba. Wonvonganamba, Dalmanuta petharam wonga.

Varisinindva Yesusmba Dasalm Umnivna.

Matiu 16:1-4

¹¹Doa monglava Varisinind ambanamba, Yesusm ambo dasalm osihminivna, os umnivna, kana novra mana ema mendekli vintuk, wo osva kava yemba nunglutithueivav, tanam Sesoa hev yemba pusvundthoana. Himba Yesusmba undnahonamba lovahmanavnamoa, himba ambo dasalm umnivna. ¹²Wo Yesus mindnam ninginvna hona moarava, undva henamba potra pihamnana. Doa hev unna, es hevpa yimba ambo novolm ambvma. Yemba kava tanamolnam ishunv, kava yena novrava mana vemamba mendekliva vinvmoa, owai.

Yesus Olhmona Ishunna, Kuwulna Wevsava Sahoklal.

Matiu 16:5-12

¹³Doa Yesusva henga nominiva hevtindim wonvenamba, botra wonvongavna, plombmonam wongavnamba, ¹⁴wo hevtindi umnina, pai, pimba innemba dumbimoa, rotiva mongasal memba nungaihalohv. ¹⁵Doa Yesus unna, ai kam hillu, manam yimba Varisinindna Herotkuwulna rotiva hleinvav, owai, aembu, henamba sahoklal vilinv. ¹⁶Wo hevtindiva no moam hillinamba, wo hevm asahmana ovna, manam osva oi, pimba rotiva dumbimoa, wo hlavavmoa.

¹⁷Wo Yesus unna, manam yimba pevpa osva ishuv, kava rotihui. Mendah kana olhmomba yimba tit vrvvma, undhui yimba vilovma? Kava rotimba ovmoa, kava Varisinindm eva Herotm nom unvna. Hena wevsava indkoklal luhunv, wo yimba hena moamba hillindava, yimba eva os vivavta. ¹⁸Wo yenamba novpa lovahinv, heva os owai, yimba nunglivmoa. Yenamba aongva lovahinv, heva os owai, yimba hillivmoa. Yimba kana moamba levrapivolvmoa owai, mendah yimba tit viv. ¹⁹Yimba nunglinama, nomba seilva temba kava rotiva 5pelarava popowol vinnamba, 5000pelara indhanamba dahwol vena? Wo innemungilva nomba, es wondamba lohna, yimba nunguwul vinamba? Wo hevtindi una, 12pelara wondamba.

²⁰Wo Yesus henga unna, lehra, wo kava henga rotiva 7pelarava popowol vinnamba, doa 4000pelara indhanam dahwol vena, wo innemungilva nomba es yimba nunguwul vina? Wo una, 7pelara wondamba. ²¹Doa Yesus unna, lehra, heva os owai, mendah yimba levrapivolvmoa kamba, ora snal lohv.

Yesusva Mongom Novtitmungilm Sishona Vrena.

²²Doa nominiva wonganamba, Betsaita kembella di wonpho, wo botrinimba wonholopenamba. Wo indhana mongom novtitmungilm

waiambanamba Yesusindam, wo Yesusm osihminina mindnam, engla holothomno, lesvhoara, noinda os novvera beswonam henga. ²³Wo Yesus kleihavranamba nom novtitmungilm, doa oklapetam wainga kembelliniva, wo muembna novval pelpethamnana, wo os englanamba kevra, es hevpa yimba doa beswonam novvevma? ²⁴Wo no tendoriniva eskand ambo novvevnamba, ona, kava nongalv, maim oi timba lovahv, heva os owai, lovahmana vev, wo noinda kava os nongalv, indhanamba.

²⁵Doa Yesus henga novval kevra, wo beswonam he wohnovvevnamba, beswonam mana emamba nonglavna. ²⁶Wo Yesus omnana, pevna deuvram wohgao, di ishunu, wo homba hengava indhanamusarava manam yimba sihavav, owai.

Pita Moakus Ona, Yesusva Mendekli Lohv, Kristus.

Matiu 16:13-20, Luk 9:18-21

²⁷Wo nominiva Yesusva wonvenamba, Sisaria Vilipai kembellam wongavna, wo monara Yesus hevtindim osihinna, indhanamba indkumbiva es hevpa kamba ningminiv, an hevpa kava lohv? ²⁸Hev umnina, monglava yemba os sevriv, Yon Baptais henga pokamarini lohv. Wo monglava os uv, yimba Elaita moashulnindrini, doara pethara men amana venam, wo monglava os uv, yimba mongo Sesoana moashulnindrini, ten doara pethara hui men euvmona venam, wo henga beswonam phona.

²⁹Wo hev henga unna, yimba pevpa es eva kamba ningminiv, an kava lohv? Doa Pita omnana, yimba mendekli lohv, Kristus, doara Sesoana yemba puvundthoana, wo hom petharam yem doa wolaihapihana, kam kolvrowol velm. ³⁰Wo Yesus unna, lehrata, heva os manam yimba hona moamba moakus uvav, owaiangas.

Yesusva Hevtindim Unna, Kamba Si Dahavav.

Matiu 16:21-28, Luk 9:22-27

³¹Doa nonam moakus unnata, osva ona, kamba si sahokla vrvivav. Kava arana ombol lohv, heva os kamba si hilvrvivav, nihsesoa vrvivav. Indkumbiva nomba mundil, katekis, sembayang andranindna kuwul, himba kamba si musk vinivav, wo kamba helvakomandhivav, kamba si wohdahavav. Heva os simba sambla si elohvrava, si kava henga beswonam phovav pokamarinimba kavna nihna. ³²Wo Yesusva osva moakus unnamba, wo Pita Yesusm waingana oklapetam, okusv vena, manam yimba osva ishov, kamba si dahavav. ³³Wo Yesus umharavhoanamba, hevtindim nongalvnamba, Pitam ononglavna, wuleihao, Setannamini yimba moamba kovovrav. Yimba ambo titmom ishomnav, wo Sesoana nengavnavga yimba tit venav.

³⁴Wo Yesus unnamba, ombandhanamba kusorava, kam hillu katindimongo, himba nomba kamba engpethalmba vevrava,

osva katindilmba sihalmba vevrava, heva os himba nomba hevna nengavnangva wuleihavra, kana nengavnangna vevra. Osangas vevra, wo eva lehra himba keknam lohavra ungunndna novrava. Manara, noinda si ungunndva hembra nihsesowolm vinivav, os kavm men. ³⁵Heva os himba nomba hevna nihtovpa lelh vrevrava, os nengvra, es kava beswonamangas avra, hembra nomba si dahavav, wo Sesoinava si avavmoa. Heva os himba nomba hevna nengavnangva wuleihavrava, kana kek vethavra, himba nomba si wohlohvav Sesoinadamba. Himba hevna nengavnangva wuleihavrava, wo kana besal nemelmom hellevra, wo indhanamoserava ishomana vinvra.

³⁶Katindiva osangas vivra, wo es hevpa mongo indhanariniva hevna nengavnangva vevrava, wo wohva esvema huhul vevrava hona petharava, wo sisva dahavra. ³⁷Doa es hevpa himba nomba besalmonam gavavma, owainonoa, mani hevna woh noi si kolvravavma, owai.

³⁸Doa himba nomba yeriniva pemba vetava, osva kanamba moamba ishuhuiiva vintava indhanamoserava, hembra nomba kava si beswonamba nonglavavmoa, nonamba hengava kava provrava. Manara noinda himba lou vivna, kana moamba ishunilmba hona pethanindmba sahoklalva. Kava arana ombol lohv, doa kava si sewonam henga hona petharam provav, Sesoana besal ovsongolnindm kava si os wonprovav, wo nonamba Sesoana pusambakambava kam lovhoamnavav, pethanindna novpa sowaivunvav.

9 ¹Wo Yesus mendah ishongeinna, hillivm beswonam, tanam kava ov, hona pethara si Sesoana nemeltindiva musera phovav. Si phorava, yimba monglava mendah si os pehnana lovahvav, wo pevna novna yimba si os nunglivav, uvav, keknamangasm lohv.

Yesusna Nihva Lovhoamnavna Mindnam.

Matiu 17:1-13, Luk 9:28-36

²Wo 6pelara simba shulanganamba, Yesus vena, Pitam omnana Yemsm Yonm nom unna, wo mongo olora wonvongo hevho. Doa himba ona nunglina, pai, Yesusna nihva doa nilhai, ³wo kayenmba lovhoamnav henamba dombalnonoa, oi okomba lovhoav. Anna eva malova osva phovav, ponamba sabonnamba pos verava, owai, osva henangas vei. ⁴Henga ona nunglina, pai, doaramini simbehumunil sambla Mosesi Elaitai wai ihisholohv, no Sesoana moashulnindrini sambla doara ten ahamana evevnam.

⁵⁻⁶Doa Pitava Yemsva Yonmba, himba mindnam pem wonvevna, moamba beswonamba ishuvnamao. Wo Pitana moa di kuelwolgana, ona, lehra kava ambei homba, yem nongalalm. Ka thindruv wondembrawol vei, vera yem, Mosesm, Elaitam, honam. ⁷Wo Pitava mendah ishovna, wo tekopukul pihanamba, mera ve, wo Sesoava no tekomera di moamba

opinna, kana memba ombolnonoa, hem kava mindnam und vev. Hena moamoa keknam yeoa hillimnvm. ⁸Wo Pita Yems Yon henga hev ona novvina, pai, Mosesiva Elaitaiva es evei, Yesusangas hevho lohv memba.

⁹Doa henga wonpiha olorinimba, wo Yesus unna, manam yimba ishunvav indhanamba, osva temba yimba nungliva. Kava arana ombol lohv, wo kava si pokamarini henga phovav, wo nonam daha yeoa moakus unu, temba pevpa nungliva. ¹⁰Wo moamba nomba wohkek vithina hevm samblamongo indhanamba, doa hevm asahmana ovna, hona moamba Yesusva memba oiva, osva kava henga si phovav pokamariniva, honamba es hevpa dihi plalva lohv? ¹¹Doa hev henga Yesusm osihminina, es hevpa katekiswa os pimba ishowol velvohinvna, nomba Elaitava simbehumunilliniva hona petharava si hengava phovav miva, wo Kristus hev si os phovav sis?

¹²⁻¹³Wo Yesus henga unna, tanamta, Elaitamsna miva phovavta, wo mana emamba mana emamba os nemel henga wohvewol vevav, wo daha Kristus hev sism phovav. Wo men kava yemba ishunv, Elaitamsnamba doa doara phona hona pethara, Yon Baptaisangas.

Wo doa yimba nonora, indhana hevna nengavnangna hem sahokla vrimnina, doa helvakomandhina. Os vinina, ten doara Sesoana moashulnindrini tombaira novol venam. Wo yimba nunglinama, mongmomba tombairava novol velohv, indhanamba Kristusmba hevmba dembhimnivav eva kinwonda plothumnivav, men kamba.

Yesus Mongo Tuendisrinim Tihsongomungilm Wolaihaphona.

Matiu 17:14-21, Luk 9:37-43

¹⁴Wo Pita Yems Yon Yesus no olorini peivvnamba, ona nungeilna, pai, indhanamba es kusoi. Wo mongova Yesustindiva mera vina, katekismund hevm di anonglamana ovovna. ¹⁵Wo Yesusva ona phona, no indkumbiva una, pai, Yesusva hevpa ten prov, wo Yesusindam dem gapianamba, di mapotho ovrivna. ¹⁶Doa Yesus osihinna, manamoa yimba eishovna?,

¹⁷⁻¹⁸Wo mongo tendorini os sevrana, ombmba kanamba tihsongomungil menav, moamba ishowol vevmoa, wo no tihsongova ombva doara vromana vev, pethara lukuhe, wo mius vevpa, wo lo bombothovpa, kikmik vevpa. Wo noinda yeindam kava waiproi, wo yenisrava yetindim kava osihiniva, tihsongom ombnamini wuleihingimnu, heva os owai, lehloh venapia, owai. Nom kava ishuvna.

¹⁹Yesusva no moamba hellenamba, unna, yimba indkumbiva kamba undnahonamba lovahthamnavmoa, osva himba hona tuendisrinimba wolaihaphovav, wo slei kamba yeindava gimus vinivma? Doa tuendisrinim hom waiambo kaimdam. ²⁰No tuendisrinim waiambna, wo tihsongova Yesusmba nonglavnamba, tuendisrinimba kekel vevna, wo tuendisriniva eisvna, pethara lipe, di umharavho vre, mius vevnamba.

²¹ Wo Yesus aralm sah ovrana, es hevpa doara os vaomana venavma? Wo aral omnana, eie doara tueind venana. ²² Doara ambo hona tihsongova nihmera sihamnanamba, wo mindnam helvakomandhalm velohv. Os suwera luweihav, eva pora levelthav. Doa yeoa osoa kana ombm wolaihapho, tanam yimba wolaihaphovavmi owaimi? ²³ Wo Yesus omnana, manam yimba sambla undva verombvav, ai tanam ata wolaihaphovavmi owaimi? Manara noinda himba nomba kamba keknamba nengmanavrava, hembra nomba ata kava mana emamba mendekli venavav. ²⁴ Doa aralva mindnam omnana, kava os nengvta, yimba ata venavav, pev kana indoa keknam lotho, wo mindnam kava ata yemba os nengmanavav.

²⁵ Wo nonamba indkumbiva kusopravna, wo Yesus nongalna, doa mindnam tihsongom ononglana, wuleihao, wohgao, manam yimba hengava hona tuendisrininamba nihrava sihavav, yimba sahokla vrenamba mahui angumi hona tuendisriniva. ²⁶ Wo tihsongo weingo ovna eunillam, mindnam wongapola vrevnamba tuendisrinimba, doa os nihmerini phona, wohgana os. Wo tuendisrinimba nomba di vindilvna, wo indhana os uvna, doa wohdahai, ²⁷ heva os Yesus englaval kevranamba, wuleihapho, wo lohvna beswonam, tihsongo doa gana.

²⁸ Wo Yesus nominiva wonvenamba, mongona deuvra wonsiha, doa hevtindi hem osihminina, es hevpa eva manara kava owai viv, tihsongova nomba engalva? ²⁹ Wo Yesus unna, himba nomba Sesoam aram sahlohmanavna elsus, wo hembra nomba Seso poaouthovav, noinda tihsongova snamba himba engalomana vevav.

Yesusva Henga Hevtindim Unna, Kamba Si Dahavav.

Matiu 17:22-23, Luk 9:43-45

³⁰ Wo Yesus nominiva wonvenamba, Galili provinsra wonkohanamba, os nengvna, ata humeis kamba mongova indhanarinimba dihi nongalvav, ora men wongav, ³¹ manara noinda osm wonvevna, himba hevtindimangas wonamana velm vevna, os unvna, kava memba arana ombol lohv, heva os kamba si sahokla vrvav, wo si ungrundna englisra desvhueivav, wo kamba si helvakomandhivav. Doa samblanin kava si verava pokamarava, henga beswonam pholahanga. ³² Wo hevtindiva hillivnamba, tit vivna, manam os ov, wo pem vimnivna osahmanalmba, osva manam hevpa yimba osva onengv?

Yesus Hevtindim Unna, Manam Yimba Pevmangas Ninginvra, Owai, Indkumbim Ninginvm.

Matiu 18:1-5, Luk 9:46-48

³³ Wo Kapaniam kembella wonphonamba, mongona deuvra wonsiha, wo Yesus di hevtindim osihinna, manamoa yimba monarava

ishulambvna? ³⁴Wo monarava nomba moamba ishulambanamba, an pina kuwulva wulluhunv? Yesushui hev ishuvna, wo noinda hev m alhwol wulambvna. Wo Yesus osihinna, wo himba lous vrvna, ata es ishumnivav, monarava doa pimba koasromb vei. ³⁵Doa Yesus avhoanamba, unna, hui aevtho, moapeta yemba kava ishowolm vinv. Himba nomba yeriniva kuwulva wulluhulva vinvrava, hev mangasva owai, indkumbim ninginvra.

³⁶Doa Yesus mongo otollinim kleihulpronamba, wolaiha hovra. Wo englana hev nimbis othomnana, wo hevtindim henga unna, ³⁷himba nomba hona otollinimsnamba beswonam mapotho ovrarava, oi otolva Yesustindirini, wo himba nomba kavmba osta mongawulmba mapotho ovravav. Wo himba nomba kamba osva mapotho ovrarava, himba nomba Sesoamba hevmba eva osta mapotho ovravavta mongawulmba, nom ten kam wolaihapihanam.

Yesusva Hevtindim Unna, An Pinamba Sehelva Luhunv?

Luk 9:49-50

³⁸Doa Yon Yesusm omnana, kava indhanarinimba os nunglina, tihsongom wolanga vevna indhanana nihmerini, wo yena nihilva sevromana vevna, os tihsongom wolanga vevna. Wo noinda kava ovumnina, yimba karini luhunvma? ³⁹Doa Yesus unna, manam yimba osva hengava vivav. Himba nomba mendekliandrava vewol vevrava, kana nihilva sevromana vevrava, indhanam os wolapho vevrava, himba nomba kamba dathovavmoa nunginamba. ⁴⁰Himba nomba pimba vrepra vremba owai vitava, himba nomba pina sehel pina mongawa andranindrini. ⁴¹Tanam yemba kava ishunv, indhanariniva yemba nongalvrava Kristustindi, wo noinda yemba ambo pongas dahwol vevra, no indhanarinimba sesva si kava nesmos vrevav. Tanamolnam kava ov.

Yesus Unna, Si Humeis Yimba Pevna Sahoklarava Indkokla Vilovm.

Matiu 18:6-9, Luk 17:1-2

⁴²Wo Yesus henga unna, memba wevsa sahoklal prov, indhanarini otollinim mai vrev, wo noinda otolliniva sahonamba vev, nomba temba kamba lovahmanavpa indnahonamba. Seso nomba indhanarinimba kinwonda plothomnavav os i, wo himba os ovav, pai, kamo doara dahata wanplombra, kava ata osva indkoklava vetamoa. ⁴³⁻⁴⁴Doa henga olhmona unna, himba nomba sahoklava noi hevna englanamba nengvtava, os maim ora, englaoa nooa kanaoa kav kokoihanga vera. Os kava si Sesoaindam mongawa englana gavav, sambla englanamba si humeis kava suweram gavm, no suwemba wohtawov.

⁴⁵⁻⁴⁶Doa himba nomba sahoklava noi hevna monglanamba nengvtava, os maim ora, monglaoa nooa kanaoa kav kokoihanga vera, os kava

si Sesoaindam mongawa monglanamba gavav, sambla monglanamba si humeis kamba suweram holopisuvvm. ⁴⁷⁻⁴⁸Doa eva himba nomba sahoklava noi hevna novnamba nengvtava, os maim ora, novoa kanaoa kav velaihanga vera, os kava si Sesoana kembella sihavav mongawa novnamba, sambla novnamba si humeis kamba tembaikassra pilpiangivm, domba temba nembelta kamba wohwehlavav, suwemba wohtawovav.

⁴⁹Doa mendah olhmona ishunvna, yimba katindiva yeoa indkumbioa keknam lovahthavm, manara noinda Sesoa yeinda wanna itowol vevav. Wo no wanmba suwemsna tavav, yena indkoklava poswol vinvra, oi helavlasowa povolv. ⁵⁰Wanmba besal hevpa, heva os wanmba tepepeva vetava, es yimba vivav, wo hengava bes vevav, owai. Noinda osva yeoa pevmoa wanmsna beswonam ningehaloho, wo etemboslamsna beswonam aevultho.

Yesus Ona, Ungevlirinimba Manam Pilpiangivav.

Matiu 19:1-12, Luk 16:18

10 ¹Nominiva wonvenamba, wo Yutia provinsram wonga, venamba, di Yotan popethalla wonpho. Wo indhana di mindnam henga kusomna, wo Yesus henga wonishomana vena hevna wevolm. ²Wo mongla Varisinind ambna, osm ambvna, Yesusm dasalm sah ovrilm, doara ningna, heoa ata Mosesna lohohmom moakoklana ishomnavra. Wo Yesusm umnina, es yimba nengv, tendorini hevna ongalmba wohwolaihangavavma, es hevpa beswonam kava osva vivmi? ³Wo Yesus unna, Mosesva doarava es Sesoana moamba novol vena, tendoriniva ongalmba wolaihangavra? ⁴Wo henga he umnina, yimba nonora, Mosesva os novol vena, himba nomba ongalmba pilpiangatava, boasna tombairasna novol vevrava, ungevlirinim vrafo, os pilpiangavra.

⁵Wo Yesus unna, lehra yimba uv. Heva os Mosesva noinda novol vena, ye yena simbehumunpev kelsombovho vivna, Sesoana moamba hillivnamoa. ⁶⁻⁸Manara noinda Sesoava hevpa seilva nengnamoa osva, owai, himba seilva manimani vaomana vena, doa vewolna tlalm ongalmba, wo unna, tendoriniva ongamba vrvrava, araravalmoa wuleihowol vevra, ongaliangas ahavra, wo si os uvra mongongal, wo noinda mongawundna wohahamana evevra. ⁹Sesoava hevpa temba ningewol vinv, manam tendorinimba snamba pilpiangavra.

¹⁰Wo dawonam deuvram wonganamba, di devvra hevtindi osihminina no ongamom, Yesus hev ten nom Varisinindm ishunim. ¹¹Doa Yesus unna, himba nomba hevna ongalva pilpiangavrava, wo mongom vrvrava, himba nomba osva ongom sahokla vrevra Sesoana novrava. ¹²Wo honamba eva os lohvtava, ungevliriniva tlalmba wuleihaiva, mongona tlara vongo, osva eva indkokla vevta Sesoana novrava.

Yesusva Unna, Lehra Otolva Wonambv Kaindamba.

Matiu 19:13-15, Luk 18:15-17

¹³Doa mongona indhana otolm wonambvna, Yesusinam wonambvna, osm Yesus awothowol vera, eva englana kekaiv vevra. Wo hevtindi onungli, engilwul ve, ¹⁴wo Yesusva nongalnamba, ongowolna hevtindim, manaram yimba engilv, lehra otolva wonambv kainamba. Honamba otolva Sesoam lovahmanav indnahonam, wo indhanamba mundilva si osta virava, sna indhanamba si osva Sesoana nemeltindilm saivvav. ¹⁵Tanam yemba kava unv, himba nomba Sesoam omnamba owai vetava, hona otolmsna ovramoa, aya, himba nomba Sesoana nemeltindilm si sihavavmoa. ¹⁶Doa nom otolm unvnamba, wo kekaiv vavovna, unna, Sesoa yem beswonam wonvera.

Yesus Indhanarinim Wohtowondm Omnana,

Indhanam Moang Vepieinu.

Matiu 19:16-30, Luk 18:18-30

¹⁷Wo Yesus nominiva venamba, monam mendah gavna, indhanarini mingo lelnam pronamba, mulumbdandna di lohvhova, wo Yesusm osahmana, guru, yimba besar, es hevpa kava vevrava, wo Sesoava kamba si hevna kembellava waiavav? ¹⁸Doa Yesus omnana, manara yimba kamba osva omni, besar, Sesoangas besarva av. ¹⁹Men henga yemba kava ishomnav, yimba pev nonora, Sesoana moamba lohv. Os manam yimba indhanarinimba helvakomandhavav, manam yimba goariskuiva vevav, manam yimba yukovpa vevav, manam moangkalava yimba ovav, ararapevna moamba hillinvra.

²⁰Wo he Yesusm omnana, kava eusilva mendah vevnamba, veiva daipota, hona Sesoana moam kava engomana vev. ²¹Wo Yesusva nonglavna, doa und vevna, doa omnana, mongongal moamba yimba mendah vevmoa. Garava, wohova dioa indhanam moang vepieinu, no indhanam dihui ten euvmona vevm, verava, yeova katindilm sihao, wo pioa mongawulm lovahmana ve. Yimba osva vetava, Sesoava yemba si beswonam kokolma venavav diva hevindamba.

²²Doa no indhanarini wohva diva mindnam iavna, wo no moamba hellenamba, undva henamba potra pihamnana, novlomosva henamba sahoklatov selthoana, doa Yesusnaminiva noinda wohga. ²³Wo Yesusva nonglana, himba gavnamba, hevtindim nongalna, unna, snamba indhanamba wohva diva temba mindnamba ievvmona vevpa, sna indhanamba si saha vrowovav, sihalmba Sesoana nemeltindilmba. Es eva, melva kekelmel.

²⁴Doa hevtindiva no moam hillivnamba, una, pai. Doa Yesus hev unna henga, tuendis kana, owaita, Sesoana nemeltindilm es eva

ombamba saivvav. ²⁵Wo olhmona henga unna, es hevpa miemba sihavavma meiskismerava owainonoa. Osta eva no wohndivva Sesoana nemeltindilmba es eva saivvav. ²⁶Wo hevtindiva no moarava os uvna, pai, pai, an eva si beswonamba sihavav Sesoana nemeltindilmba?

²⁷Doa Yesus hem nongalna, unna, heva himba nomba hevna nengavnangnamba Sesoana nemeltindilmba sihavav, heva os owai, heva Sesoana andrava memba hevangas heva vewol vev, indhanamba wonsihalmba hevtindilva.

²⁸Wo Pita ishomnana, kam nongalo, doa kava kavnamba wohva dembrehalaha ambna, wo men kava mongawulm lovahmana vev yetindilm, kamba si es yimba vinvav? ²⁹Doa Yesus unna, yemba kava tanamolnam unv, himba nomba kamba engpithivrava, wo kana besal nemelmoa ishuvmona vinvrava, himba nomba nombalvhoawol vivav hevna owalmba, etehumunilm, muskovolm, towandaslalm, araravalm, molombolm, deuvm, osom.

³⁰Heva os hembra nomba si kava mana ema esvema sesm vinvav hona petharava, kava sesm vinvav deuvm, etehumunilm, muskovolm, avalm, molombolm, osom. Doa kana ungundva hembra nomba sahokla vewol vivav. Heva os sewonamba Sesoana kembellava himba si beswonamangas wohaevvav. ³¹Wo himba nomba daipotava indhanana kuwulva ilvahinvpa, sna indhanamba si nonamba vahsingiva lovahvav. Wo himba nomba daipotava memba vahsingiva lovahvpa, sna indhanamba si sewonamba mendeklilmba lovahvav.

Yesusva Henga Unna, Kamba Si Helvakomandhivav.

Matiu 20:17-19, Luk 18:31-34

³²Wo Yerusalem monam wongavna, Yesus hev miva gavna, wo hevna hellelnindva sis angavna, mindnam duus vivna, Yesusmba mani si vimnivav di Yerusalemra? Wo mongla indhanamba sis enggivna, pem vivna. Wo Yesus hevtindim unna, indhanahuiram hui kusotok. ³³Doa yem ka ishuni, os si kamba vinivav Yerusalem kembellava. Hillu beswonam, Yerusalemram pimba angav, wo kava arana ombol lohv, heva os kamba di ungundra wetat unvav, wo sembayang andranindna kuwul eva katekis kamba moa waiishuvav, ora nonam si yemba helvakomandhivav. Verava, kamba wetat umnivav di meisungundinda Romduanginda. ³⁴Wo himba eva kamba osva vrepra vrevra. Wo indhanamba kamba si os muembkosvna wehlavra, evndakalna hilvivra, wo verava, kamba si wohhelvakomandhi. Wo samblanin ambo kava verava, wo henga beswonam pho.

Yemsi Yoni Kuwulalm Eloholm Ohona.

Matiu 20:20-28

³⁵Doa Sepetina ombolsambla Yemsi Yoni epranamba, Yesusm ohomnana, kava moapeta yem wulelohmanav. ³⁶Wo Yesus unna,

manamom hevpa yimba kamba sahaln ohomnav? ³⁷Wo himba ohona, os kam vinu, kava kuwulalm si elohe yeinda murapeta, vevra sihanasis lohvra mongova, mongova nihanasis lohvra, yimba si sewonamba kuwulalm lohvra indhanana indkumbina novrava.

³⁸Wo Yesus henga unna, yimba kamba ohosahmini, heva os yimba mendah tit evev hona andramba. Es hevpa kanamba yimba kinkumbi tanam ambo pulengavavma? Wo kamba nihsesoava vimnivrava, yimba kamba tanam ehengpravavma? Ungundva yemba helvowol vivav, wo yimba ambo tanam keknam elohvavma? ³⁹Wo himba ohomnana, kava tanam si elohvav. Wo henga Yesus unna, tanam yimba si nonamba kinmba kanamba pulengavavta, wo yemba eva si nihsesoava vinvav. ⁴⁰Heva os memba kamba ohosahmanavnamba, ova kuwulalm kam awowol veo, owai, kava unvavmoa, Sesoangas heva hev hona andramba puvund vev.

⁴¹Doa monglava 10pelava Yesustindiva hillinamba, Yemsiva Yoniva os evena, wo os musk vinvna i. ⁴²Wo Yesusva lihawol venamba, wo hevtindim unna, kusotok, yem ka ishuni. Yimba pev nonora lovahv, kuwulva himba nomba temba ilvahinvpa puehalnindnamba, indhanamba hena keusingi lovahinv, hengas ondal vewol ovovra, wo himba vengas viv hena moara. ⁴³Wo yemba ova ka unv, manam ova yimba katindiva lovahv, owai, kuwulva yeriniva snamba luhunvmoa. Himba nomba kuwulva yerinimba hovrava wulluhunvtava, wo heoa ambo andranindrinimsna luhunvra, wo yemba wonandra vevra.

⁴⁴Doa himba nomba yena kuwulva wulluhunvtava, heoa hevna nengavnangva maivethavra, wo indkumbina nengavnangra andra vevra, os kav men vevm. ⁴⁵Kava arana ombol lohv, wo heva os kava ova pronamoa hona petharava, wo ondal vewol ovoe indkumbimba. Owai, kava osm prona, indkumbim ambo kollombvra. Wo eva kamba si dahavav, wo nonamba kava indhanamba mindnam kilumbshuawol vevav hevna sahaposworiniva.

Yesus Mongom Novtitmungilm Sishona Vrena Batimeusm.

Matiu 20:29-34, Luk 18:35-43

⁴⁶Wo nominiva wonganamba, Yeriko kembellava wonkohavnamba, ambo wonkohangavna indkumbim hevtindim, ombandhana eva mongawulm gapiavna. Wo mongo indhanariniva novtitmungilva monara avna, nihilva Batimeus, wo himba Timeusna ombol. Monara ambo avna, indhanamba okohowovnamba, ambo himba owovna, senpeta kam aiv velaihakov venavm, osoa dombvna. Wo hev di avna, Yesusva nonamba wonongovnamba, ⁴⁷doa os hellenamba, Yesus Nasaretrinimba men wonokohov. Doa he mindnam di wunuho, os Yesus, yimba mendekli Devittindirini, kam wavra vovhoamno. ⁴⁸Wo indkumbi di lalkoho, os

wuleihao, wo henga he di mindnam wunuho, yimba mendekli, kam wavra vovhoamno. ⁴⁹Doa Yesusva hellenamba, lohvhwa dawonam, unna, umnu no indhanarinim, kaindam prora. Wo anganamba, novtitmungilm umnina, indk vetho, pho, Yesusva yemba omni. Gao Yesusindam.

⁵⁰Wo himba lelnam phonamba, bayupanasva selvhsapingavna, lelnam Yesusindam gavna.

⁵¹Wo Yesus omnana, es ata yemba kava venavav? Wo hev omnana, kava henga beswonam novvelm vev. ⁵²Wo hev omnana, gao, yimba kamba indnahonam lohmanav, wo noinda yemba kava sishona vrei. Wo noinda he beswonam nongalvnamba, Yesusm engpetha, no monam angvnam Yerusalemram.

Yesusva Yerusalem Kotara Kuwulalmsna Sihana.

Matiu 21:1-11, Luk 19:28-40, Yon 12:12-19

11 ¹Wo murava wonvenamba Yerusalemrava, doara wonkuvhoawol venamba kembelsamblamba eusilva, no kembelva os uv Betpaki Betani. Wo diva murava olomba nomba os ningthiv oliv denwit.

Wo nominiva Yesus unna hevtindirinin samblam, ²mi yesna engo no kembellam, wo yimba ata donkitam enonglavav, no donkirava indhanamba nonamba lovahmana venamoa doarava. Ohomnarava, waiupra, ³wo anemamba yemba ova sah owol vetava, manaram yimba donkitava waiengav, os uhunu, Yesus mendekli nona lohmana velm vevpa, ata lohmana verava, henga ata waiambvav lelnam.

⁴Wo enganamba, enonglana, men donkitava lohv, wena kleihinamba, monapethalla lohvena di deuvra. Wo himba donkitana wemba epelvhoavnamba, ⁵wo indhana sah owol vi, manaram yimba donkitana wemba epelvhov? ⁶Wo he uhunna, os Yesus ten doara hevm ishunnam. Wo hev unna, wouta waiengo. ⁷Doa himba donkimba waienganamba Yesusindam, wo hevna malova sena moan vehola evena donkisra, wo Yesus nosra avho, Yerusalemram os noinda gavna.

⁸Doa indhanamba hevna wevsava doara vewol vivna, hembra nomba kuwulalva pusvundthueivnamba, wo seilnovrava sihavnamba, monarava os vavta velahangavna kayenmba nemel. Wo tivtanda besal vvel hilhala uvnamba peillini, monara vavta vilaheingivna, osm kuwulva dakonda vilsiha. ⁹Wo Yesusva nonamba sihavnamba donkinamba, indhanamba vena mi sis, Yesusva hovra lohvena. Doa saivnamba, indhanamba kingawonga vruwul ongowovna,

Os hosana, osm uvna, Sesoam kava okuliv, wo hev yem poaouthovra, yimba hevna moara kuwulalm meprova. *Buk Song 118:25-26*

¹⁰Wo yimba si kana kuwul wulluhunvav Devitna vuhera, ten doara heva kana simbelna kuwul wulluhunvnam. Wo henga kingawonga vruwul ongowovna, hosana.

¹¹ Wo Yerusalemra diva phonamba, tempella siheine, no tempelva Yutanindna mendekli sembayangduv luhunvna. Wo di mera mum vaomana vena, doa simba okilvravnamba, nominiva wonganamba hevtindim, wo henga Betanira ninmba wonlina.

Yesusva Tim Fikm Omnana, Yemoa Wohsoulara.

Matiu 21:18-19

¹² Wo mongnasiva henga nominiva wonvenamba Betaniriniva, doa wonprona henga Yerusalemram. Wo monam wongavna, Yesusm pon vene, ¹³ wo mongo tim fikm nonglalm siha monapethalla, nomba fikva vlevla mindnam lohvnva. Doa Yesusva sihanamba, nom fikmovm silelvna, movol endvmi, heva os owai, novvelohvnamba, endvnamoa, mendah. ¹⁴ Doa Yesus no tim omnana, kava ovov, movolva yemba si hengava endvavmoa, hlalmba, yemoa wohsoulara. Wo hevtindiva no moamba os hillina.

Yesus Bisnisnindm Engalungu Vena Tempelmerini.

Matiu 21:12-17, Luk 19:45-48, Yon 2:13-22

¹⁵ Wo Yerusalemra wonphonamba, henga tempella wonsiha, doa bisnis indhanam nom tempelmerinim engalungu ve, di esvowolvnam. Vevnamba, no indhanana meyam mulgothowul vivvna, diva tholpingu vivvna, no meyarava duangna di dombawuvna sembayangnindna, wo tempeldiva dembreluhunvna.

Doa himba kursim mulgothowul vivvna, no kursirava di dombawuvna, leumb hembra holvorombrehunvna. No tempeldina leumbna sembayangnindva os vivvna, dembvna, leumbva sembayang andranindm holvorehunvna, suweram wiwehalm Sesoam, dingas hevpa disumbra dembhapuv vehal vevna.

¹⁶ Doa Yesus ovunna, manam yimba hengava wohva hona deuvrava huiva aisuv vevav tempellava. ¹⁷ Manara nengara tombairava Sesoana moamba os novol velohv,

Hona tempelva kana deuvpa memba lohvpa, os yepev Yutanind wo indkumbi annind annind hona deuvraoa kamo a sembayang vevuvmonavm.

Aisaia 56:7

Sesoava hevpa os ona, heva os yimba vuhemba kelvhueinvna, dimangas ningminivna, noinda deuvpa honamba os lohv, oi, indhanakoklana deuvpa.

¹⁸ Doa sembayang andranindna kuwul eva katekis hillinamba, Yesusm muembnavho vrivna, os ningvna, ombandhanamba Yesusna moam hillivpa, wo os luklukul vriv, lehra ovta. Doa noinda ishuvna, es pimba Yesusmba kevrirava poaita, helvakomandhalm? ¹⁹ Wo okombava vohavnamba, Yesusva nominiva wonvohavna Yerusalemriniva.

**Yesus Hevtindim Unna, Yeoa Sesoam Keknam Pevna
Undnahonam Ningminivm.**

Matiu 21:20-22

²⁰Doa mongnasiva simolnam monam henga Yerusalemram wongavna, no denwitm fikm ona nunglina, doa vlevla plalva wohksuvhoai. ²¹Wo Pitava Yesusna moam nom omminim nengna, omnana Yesusm, nonglo, hona timba yimba omba omnanamba, doa ksuvhoai, ambo tanamolnam yimba saha vruluhna.

²²Wo Yesus henga unna, hi hevpa mana ema mendekli kava venama, snamba an ona? Yemba kava tanam ishuv, Sesoamo keknam yeoa lovahmanavm pevna undnahonam. ²³Yimba eva os vivavta, wo hona olomba yimba osva umnirava, wanplombra pilpeo, wo Sesoava osta vevav. Wo manam yimba sambla indva lowohivav, osva tanammi owaimi, mongawundnamba yimba lovahtava, Sesoava vevav.

²⁴Wo noinda yemba kava unv, Sesoam yimba mana emamba osihminivrava, mongawundna vivm, wo yemba osva Sesoava vinvav. ²⁵⁻²⁶Wo yimba Sesoamba sembayang vinirava, yeoa boasna indhanana indkoklaoma maisasa vrinu, temba yemba indkoklava vininamba. Manam yimba hengava ninginvav, esesmba velmba, owai. Yimba osva vivrava, wo yenamba Sesoava arapevpa osva si sahoklava maikumi vinvav.

Yutanindna Kuwul Yesusm Sah Ovrivna, An Yemba Pusvundthoana?

Matiu 21:23-27, Luk 20:1-8

²⁷Wo Yerusalemra henga wonphonamba, tempelmera wonlohmana vevna, wo monglava kuwulva prapia, sembayang andranindna kuwul, katekis, Yutanindna mundil, himba Yesusindam prapia, ²⁸wo umnina, an yemba omnana, wo noinda yimba osva vewol vev? An yemba pusvundthoana, wo noinda yimba bisnis indhanam engalungu vevna hona tempelmeriniva?

²⁹Doa Yesus sesm unna, dawonam, yem kava sah owol velm vev, wo yimba kamba ishumnitava, osva ata yemba kava moakus unvav, henoi kamba pusvundthoana, noinda kava osva vewol vev. ³⁰Yimba pev doa doara nunglina Yon Baptaisna andramba. Wo an Yonmba pusvundthoana, ora indhana ambo, ora Sesoa hev? Wou kam ishumnun.

³¹Doa kuwulva nomba hev m poaita ishuvna, osva pimba umnitava, Sesoa hev Yonmba wolaihaprana, wo himba ata os ovav, esm yimba Yonna moamba eva engangava owai vivna? ³²Wo pimba umnitava, indhana ambo Yonmba pusvundthueina, owai Sesoava, ata pimba ombandhanamba helvowol vivav, manara noinda himba os ningy, Yonmba Sesoana moashulnindrini. ³³Wo noinda Yesusm umnina, es ata

kava yemba ishumnivav, an Yonmba wolaihaprana, pusvundthoana, kava tit viv. Doa Yesus unna, yimba kamba beswonamba ishumnimoa, wo noinda ata yemba kava moakus unvavmoa, osva an kamba pusvundthoana, noinda kava osva andra vevna.

Yesusva Olhmona Unna, Yutanindna Kuwul Kana Moamba Aongpa Viv.
Matiu 21:33-36, Luk 20:9-19

12 ¹Doa Yesus no kuwulm olhmona ishunvna, mongo indhanarini oso wolavnamba, no osomba weselmuvoso, no weselmuvpa os ningthiv grep. Wo pueilva ningivnamba, doa mongo mel tovhoanamba, grepmovm noinda polm sovhowolalm. Doa kekalvhoruvpa dembrana, noindam hevna osom kelvhoalm. Wo monglam andranindm himba sandhana, diva osorava andra vivna hevnisra. Doa himba hevpa dawonam wohgana, mongona kembellam oklam gana, os isholahangeinna, grepmovpa si endungu verava, si aembul ksuvhoarava, piv si moang vivav, vera yem eva kavm, yimba kana osondra viv.

²Doa aembulva vevnamba grepmovpa, wo osona aralva hellenamba, mongom andranindrinim wolaihangana, omnana, gao nom kana andranindm undava, yem dembrehura kana grepmovoa. ³Wo andranindriniva ganamba, no osorava ona phona, wo no andranindm kevrinamba, hilvi, umnina ambo posal gao. ⁴Wo henga osona aral mongom wolaihangana, ikao. Wo henga andranind di kuwul powalmini, sahokla vruwul ve.

⁵Wo henga osona aral mongom henga wolaihangana, wo andranindm helvakomandhie. Wo osona aralva henga andranindm mindnam wolanga velohvna, heva os angavnamba, andranind noi monglamba ambo helvowol vivna, monglamba helvakomo vivna. ⁶Wo osona aralva hev ona, owai, andranindva eivvmoa, kavna ombolm mongasalm waiavna, kava mindnam und vev. Wo hembra kava wolaihangarava, si beswonam hillimnivra.

⁷Doa wolaihangana ombolm no andranindindam, heva os owai, hillinamo, wo una, hona tuendisriniva si mendekli verava, si os ovav, kana pethava memba, heva os yenamba owai. Wo helvakomandhalvohra hemoa, wo pivmangas hona pethava si wohluhunvav. ⁸Doa noinda helvakomandhinamba, mindilva puehallam vindpingina.

⁹Wo Yesusva olhmona mendah ishongeinvna, doa osona aralva es si andranindm nomba vinvav? Es yimba ningv?, hev si osoram garava, no andranindm helvakomo vevav, monglamba andranindm unvav, kana yeoa andra viu. ¹⁰Wo Yesus mendah ishongeinvna, doa pev nonora, os Sesoana moamba tombairava novol velohv os,

Andranindva honduv andembrana, wo mongova honmba nunglina, una, sahoklal, wo piengi. Wo heva os no honmba henga mongo

andranindrini vra, wo no honmba daipotava lunitilm wohlothol lohv. ¹¹ Sesoava hev vena, wo pimba nunglivnamba, wo besal hevm. *Buk Song 118:22-23*

¹² Doa kuwulva Yesusna olhmomba hillinamba, liheivna, plalmomba pi inda, manara noinda Yesus hev ona, yimba indhanakokla. Doa noinda Yesusmba awusapramana venavna, bui velm vivna. Heva os owai, bui vinamoa, ambo ombandhananapenam pem vivna, humeis ata pim helvowol vivm, wo noinda Yesusva nunglul liheinamba, hevpa buketha.

**Varisinind Yesusm Dasalm Umnivna, Osm Moakokla
Ishomnavra Duangm.**

Matiu 22:15-22, Luk 20:20-26

¹³ Wo dawonam monglava indhanamba ambanamba Yesusindam. Mundil hembra wolambv vena. Monglava katekisva, ten Varisinindilm lovahvna, monglava Herot kuwultindiva, himba Yesusm sah ovralm ambna ambo dasalm, os ningvna, heoa moakokla ishomnavra Sisa duangm.

¹⁴ Ambanamba, os dasalmomba ishumnivna, kava yemba nonora, yimba tanam ishowol vev, yimba mongawamoa ishowol vinv kuwulm, ombandhanam. Yimba mongawamoa ishowol vinv, yimba pemba vewol vevmoa, yimba musera ishowol vinv, yimba besmoa Sesoana moamba ishowol vinv indhanamba.

Doa kam hona moam beswonam ishunu, men pimba taeks velvohinvpa duangm nom Sisam. Es hevpa hona wevsava pimba beswonam vivmi owaimi? Sisa duangm piv taeks vimniv ora owai?

¹⁵ Wo Yesusva nonora luhunvna, unna, anm dasalva yimba umnivna?, hom sen viliwulambrava, ka nonglai. ¹⁶ Wo mongova senmba Yesusm vilirehuna, wo Yesus sah owol vena, anna memba kuva namamba hona sendava kovopathalohv? Wo he una, Sisana duangna, pev nonora lohv. ¹⁷ Doa Yesus henga unna, hona senmba Sisa duang venamba, wo pimba taeksrava hevm Sisam henga dembraholvohv, wo manapenam, beswonam viv Sesoana novra. Doa Sisa duang pimba taeksm sehinvrava, dambroh vivra, wo doa Sesoava hev mana vemamba pimba sehinvrava, osvva vinivav.

Wo noinda nomba mundilva os luklukul avramana vena, pai, Yesusva doa pina wemba pelpikoheini.

**Kuwulva Yesusm Dasalm Osihminina, Mindilva Tanam
Pulvovavma Pokamariniva?**

Matiu 22:23-33, Luk 20:27-40

¹⁸ Wo dawonam mongla kuwulva ambanamba Yesusindam, Satusilm himba lovahvna. No indhanamba os euvmona ovovna, si tanam mindilva

pokamariniva pulvovavmoa. Doa Yesusm he dasalm osihminivna, ¹⁹Mosesva doara heva Sesoana moamba novol vinna, osvva mongova tendorinimba dahatava, wo ongalva otolhui amnavra, wo boasalal henga moamulmba pethavav, wo towand eve, wo no otolva indhanamba si os uvav, eisilna vuheram, ten doara dahanam.

²⁰Wo men kava yem osihminiv, mingo aratindi 7pelara lovahvna mendekliangas, wo etelsna ongamba vranamba, wo etelmba dahavna, wo otolva lohmananamoa, ²¹wo pelimba boasalal vra, vranamba, wo daha boasalalva eva otolmba waiamnanamoa. Wo mingo boasalal pelimba henga eva vra vranamba, wo daha, wo osangas vruwuvna no ungevlinrinimba. ²²Venamba, osangas 7pelara nomba aratindiva sihapiana, wo otolmba no ungevlinriniva waianamoa, wo ungevlinrinimba sism dahanata. ²³Doa yem kava sah ovri, sewonamba mindilva indhanamba hengava pokamariniva phopiarava hevna nihna, an hevpa hona aratindirivna, ungevlinrinimba nomba memba vruwuvnamba, an hevpa vravav?

²⁴Doa Yesus unna, yimba sahonam ui, manara, yimba tit viv moamba tombairinimba Sesoana moamba, eva yimba tit vivta, Sesoava keknamangas lohv. ²⁵Mindil indhanamba indkumbi si pulvovav, doa si muhsoh lohavvav, os Sesoana ovsongolnind muhsoh aevvm.

²⁶Yimba nonora, Mosesva temba nonglanamba suwemda taihavna tira, heva os no timba tavnamoa. Sesoava Mosesm nonam ishomnana, os kava mendah men mendekli lohv Aprahamna Isakna Yakopna. ²⁷Sesoava os ishomnana, wo noinda Mosesva os wohlihana, no kana simbelva samblamongova, ten doara dalnam, mendah lohavv Sesoaindava.

Mosesva os lihanamba, wo noinda pimba liehiv, mindilva indkumbiva si tanam pulvovav pokamariniva henga hevna nihna. Honamba Sesoana moamba yimba levrapivolvmoa, wo noinda yimba kamba dasalmomomba ishumnivna, mindilva es pulvovav pokamariniva?

Katekis Yesusm Osahmanana, Heni Sesoana Moamba Kuelwolv?

Matu 22:34-40, Luk 10:25-28

²⁸Wo mingo katekiswa di mura hellowol lohvna, Yesusva wonishovnamba, os nengvna, Yesusna moamba besal hevma, wo Yesusindam pronamba, Yesusm omnana, kam omno, heni Sesoana moamba mendekliva lohv? ²⁹Doa Yesus omnana, honi Sesoana moamba mendekliva lohv, wo Moses novol vewol vena,

Yimba Israelnind yeoa hillivm, Yawe pina Sesoava einv, wo himba mongongasal einv, wo yeoa nom Yawem undnahonam nengeuvmona vinu, ten pina Sesoa einvm. ³⁰Wo yimba osvva Sesoamba und vivrava, wo manam yimba sambla undva vewol vivra, owai, mongawundna vivm, wo manam yimba ambo seposam vivav, owai, pepthanam vivra.

Lo 6:4-5

³¹Wo mongova Sesoana moamba mendekliva os novol velohv,
Yeoa indhanamoa os nesmos vewol vivm, os pev pevna nihm ten
lelh vewol vivm. *Wok Pris 19:18*

Honi Sesoana moasambila mendekliva eluhunv pim.

³²Wo no katekis henga Yesum omnana, yimba lehra oi, tanam yimba oi,
Sesoava mongongal av, wo mongova avmoa. ³³Wo hemangas pimba ind vinivra,
wo ningminivra indnahonam, wo eva vevra, indhanam pi nesmos vewol vivra,
os pivm men pi lelh avramana vevm. Doa hona wevsava, memba yimba kamba
ishuniva, kuvhoav, wo pina wevsava ambo tuvulinv, hona wevsava memba
pimba tatamba innemba weisumbulol ololohvpa huiva tempellava.

³⁴Doa Yesusva hellenamba, no katekisva nonoramsna ishov, oi pimba
Sesoam mongawundna und vivra, wo hev omnana, yimba murapeta doa
sihalm vev Sesoana nemeltindilm, mendahpeta vev.

Wo Yesusva ishopianamba, indkumbi pekmek vivna, wo hengava
Yesusmba dasalmba ishumninamoa, humeis ata kana moakoklam
indhanamusara moakus unvm.

Yesusva Unna, Katekisnamba Nengavangva Tuvulinv.

Matiu 22:41-46, Luk 20:41-44

³⁵Doa dawonam Yesusva mendah indhanam wonamana vevnamba, moa
wonishomana vevna di tempelmera, wo he unna, yimba nonora, katekisva
yemba os ishulvohinvna, si mongova indhanariniva provav Kristus, Sesoa hev si
pusvundthoavav, pivm Yutanindm wolapho velm vevav, wo himba Devittindirini
luhunvav, ten doara heva kuwul wulluhunnam. Tanam himba osva uv, heva os
mongmomba men kava yemba ishunv. ³⁶Yimba nonora, doara Sesoasongol no
Devitna nengavangngm otuhtna, wo Devitva noinda novol vena os,

Doa Sesoa kana mendeklim ishomnav Kristusm, os yemba kava
mendeklielm pusvundthoav kavna nihanasis, osm kav men
lohv, wo si ungundmba yenamba ka engilinvav, yena keusingi
lovahmanavav. *Buk Song 110:1*

³⁷Wo hona moara Devitva os ona, Kristusva si mendekli luhunvav, oi
Sesoa hev, wo kamba kuvhoavav. Doa es hevpa katekisva yemba osva
ishunvna, Kristusva Devitna sespel si lohvav, wo Devitm kuvhoavavmoa?

Doa ombandhanamba indkumbiva Yesusmba hillivnamba, os uvna, pai,
besalangas.

Yesus Unna, Katekisnamba Wevsava Tuvulinv.

Matiu 23:1-36, Luk 11:37-54 eva 20:45-47

³⁸Wo Yesusva moamba mendah ishunvnamba ombandhanam, unna,
yeoa novnovhora katekisna wevsanapenamoa vinu, manam yimba osva

vivav. No katekiswa kayenmba tokol vewol viv, kam unvra, himba nonora lovahv mendekli, wo musera di lovahmana vevna netesnalm. ³⁹Wo himba sembayangduvra os vivna, hev m besallangas avhoapravna kuwulmsna, wo innemba dahwol vivnamba, himba indanam besalla aevulvna. ⁴⁰Wo himba pelimba dasalm ovivnamba, wo wohva osva muehrombol vivna. Doa vivnamba, dasalm Sesoam ambo sembayang vivna, hev m selawosla vewol vivna indhanana novra, heva os owai, sewonamba si Sesoava hembra mindnam kinwondava plothowol vivvav honamba.

Mongo Peliongo Ambo Aiv Sambla Senmba Disumbra Vilipipohowolna.

Luk 21:1-4

⁴¹Wo Yesusva mendahva diva tempelmera lohvnamba, mura di disumbra avhoa, ambo nongalvna, sembayangnind sen aiemb vevnamba, di dembrapuv ve. Dinindva mindnam senmba mindnam dembrapuv vevna, ⁴²mongo peli pronamba, dihui amana vevna, wo ambo aiv sambla senmba vilipipohowolei olpeli.

⁴³⁻⁴⁴Wo Yesus nongle, hevtindim unna, hillu, yem ka ishuni, wo hev unna, yemba tanamolnam kava unv, hona dinindva senmba mindnam dembrapuv vei, heva os mindnamba mendah wulav, wo no peliva dihui, wo nomba ambo senmba samblava vilipipohowolei disumbrava, wo noinda he kuelwolv no dinindmba. Manara noinda himba osva nengeimoa, inneram kavm wulav, owai, ambo vilipipohowolei.

Yesus Tempelduv m Ona, Ungund Si Taka Vivav.

Matiu 24:1-14, Luk 21:5-19

13 ¹Wo Yesusva tempelliniva nominiva ona phona, mongo hevtindirini omnana, nonglo, hona pina tempelduvpa besal hev m luhunv mendekliangas. Honna dembrina, honmba honamba seswit os i. ²Wo Yesus omnana, tanam hona deuvpa mendeklikumbi, heva os si sewonamba wohtaka vivvav, wo honmba honamba lohvvavmoa, owai, pethara si velaiha luhungu vevav.

³Doa nominiva tempellinimba wonganamba, wo olora wonpho, nomba olomba os ningthivna olivdenwit, wo avhoanamba hevpa tempelduv m henga nonglanga vavovna, doa Pita, Yems, Yon, Endru, henga ambanamba, Yesusm sah ovri, ⁴Henanam hevpa nomba si phovav? Esalm mani hevpa si phovav, wo noinda pimba ningvav, pina tempelduv m ata wohtaka vivvav?

⁵Wo Yesus henga ishunna, yeoa novnovhora aevvm, indhanamba dasalm si humeis yemba sahokla vewol ovivra. ⁶Si sewonamba indhanamba mindnam pulvuuvul vevav, si os ovra, mekava Kristusva provta, wo indkumbim indhanam gekala unvav, wo indhanamba si os uvav, tanamta. Heva os owai, mendah kanamba lohv.

⁷⁻⁸ Wo yimba si hillivav, no kembellava ten owalwol, wo yimba si nungeilvav, indhanamba owalwolvrava, wo si daoskumbi mongnind mongnind ohovav, no pethara no pethara ohovav. Wo si nenv vevra mongona kembella mongona kembella, wo si owous phovav no kembella no kembella. Hona sahoklasna si phovav, heva os owai, mendah kanamba lohv, wo mendah hona pethava lohv, manam yimba osvav, oi, meprovmi Kristusva. Owai, boasna sahoklava mendeklikumbi indhanamba si nongalphovav, oi ungevlirinim kelathamnav.

⁹ Doa hona sahoklava phovrava, yeoa beswonam novnovhora vivm. Noinda viu, indhanamba si os yemba katindimba wonishovav, wo buimera wolasuv vevra, wo sembayangduvra yemba monglamba si helvowol vivav, wo yemba si wonangavra kuwul mendekli indam, di yemba perkarra wonvivav. Hona plalmomba os lohv, men pev kana andra vivm. ¹⁰ Wo yimba nonamba beswonamba no kuwulmba ishuvra, kana nemelmomba ishuvra, wo osangasta kembelnindva ehalmindva indkumbi boasna kana besalmomba hillirava.

¹¹ Doa nonamba kuwulva yemba ongowol vivrava, osvav manandra yimba viv?, wo manam pemba yemba eiswol vevav, Sesoasongol hev yemba si os otuhowol vevav, wo moamba beswonamangas yimba ishuvra, manara nengara mani pevna nengavnangnama yimba ishuvav, owai, Sesoasongol hev yemba otuhowol vevav, os ishu.

¹² Wo nonamba daosva ohovrava, wo si osvav indhanamba wavrava owalva unvrava, wo etelva eva wohtivra, boasalamoa wangkomandhiu, himba Kristustindirini. Wo aralva ombolmba os vinvrata, wo tovotalva pulvovra, wohtivra, araravava helvakomo viuta.

¹³ Indkumbi yemba si os nungeilvav, katindi memba, wo noinda yemba si musk vivav. Doa himba nomba keknamangasva lovavrava, wo kamba maivethahuiva vivrava, hembra nomba Sesoava si hevalm nembra mana vevav.

Yesus Mendah Ishongevnva, Olhmona Ishona, Mana Ema Sahoklal Si Phovra Yerusalemrava.

Matiu 24:15-28, Luk 21:20-24

¹⁴ Doa yimba si indhanarinimba nunglivav hui Yerusalemra. Himba tihmonasharava si os lohvav sahoklal, snamba Sesoava os omnavav, yemba kava ovomnav, wo kava kavna tempelduvpa wohwuleihav noinda. Doa nonaoa pevava Yutia provinsnindoa lelnam meishanam vovoha vevm, olora dawonam di aevvm.

Yimba memba honamba tombaimomba nunglivpa, yeoa beswonam ninginv, wo yimba osvav hona olhmopetava liheivav.

¹⁵ Wo no sahoklava phovrava, wo nonamba himba nomba mendah ambara avra devrava, manam himba nomba hengava merava devrava

sihavra, wohva dambolmba, owai, lelnam ambo meishanam vohavm.

¹⁶Wo himba nomba osorava andra vevrava, manam himba nomba gavra deuvramba, wulkalmba kayenmba hevnamba, owai, ambo wailmonam wohgavra oloram. ¹⁷Mongova ungevliriniva nonamba enamba avrava, wo mongova otolva lupulilva waiavrava, wavro, nonamba ambo sahokla nongal lohvav, saha vrivav lelnamba gapialmba. ¹⁸Wo yeoa Sesoamo a elsus osahuwuvmonavm, os manam seponamba hona sahoklava kamba nongal lohvav, osombnam heva vera, lelnam osva kava gapiavav.

¹⁹Manara, nonamba hona kinkumbiva indkumbimba si plotheinlav ora i, hona kinkumbiva mendekli hevm, seilva espetambo lohvna, Sesoa seilva hona pethava venamba, veiva daipota men, wo eva sewonamba si osva owaita. ²⁰Wo nonamba Sesoava no kinkumbiva si eneha ambo wuleihavav, indhanam si humeis indkumbim dalvm. Sesoava monglava indhanamba doa doara kikih vewol vena hevtindilm, wo noinda si humeis nomba sihapivm.

²¹Wo nonamba mongova indhanariniva osva yemba unvrava, nunglu, men Kristusva, Sesoava hehonam puvundthoana, doa men proi, wo mongova yemba osva unvrava, Kristusva no kembella doa phoi, wo manam yimba hilwul vivav, ambo gekala yem temba unv. ²²Moangakalanind snal si pulvovav, wo mana emamba mendekliva vewol vivra ombandhanam, osra luklukul vrivav, ambo uvav Sesoanamini. Himba Sesoanindm nomba dasalm vinvra, kam engalpethavra, heva os owai, Sesoava eva nongalihavavma, kava temba kikih vewol venamba. ²³Doa yemba kava moakus uni, honamba si sewonamba os phovav, wo noinda yeoa novnovhora vivm, hona sahoklava manimani yemba nongalphovrava.

Yesusva Unna, Si Kava Henga Provav.

Matiu 24:29-31, Luk 21:25-28

²⁴Wo no sahoklava boasna nongal lohpiarava, wo nonamba kana prolmba si os phovav.

Doa okombava lovhoavavmoa, wo weisva eva osta, ²⁵wo paiva ovriniva velaral vevra, wo eva manimani nomba ovrava temba keknamba lohvpa, monamba si owulihivav. *Aisaia 13:10 eva 34:4*

²⁶Kava arana ombol lohv, doa nonamba kava si tekohovrava petharam pihavav indhanana novra. Wo kavna pusambanakambava kana kura si os lovhoavav, yena novpa sowaivwol vinvav, wo an eva kana moamba piengavav, owainonoa. ²⁷Doa nonamba kava si kavna ovsongolnindva wolanga vungu vevav. Vevrava, wo henoi katindimba kaina nembraomana vivav, nom Sesoa doara ten kikih vewol venam no petharinim no petharinim indkumbim.

Yesusva Unna, Yeoa Novnovhora Vivm Kana Prolmoa.

Matiu 24:32-35, Luk 21:29-33

²⁸Doa Yesus henga unna, hona olhmom keknam kana hillivm, timba polva engsihaiva, wo ningilva nemelva pehlothovpa, wo yimba os ningv, doa mura osombva pholm vev. ²⁹Doa yimba nomba nunglivrava, yem kav men seilm ishunim, wo ova yimba nonora ningvav, ora Yesusva mura prolm vev. ³⁰Tanam, mani wenokombonamma, monglava yeriniva si mendah lovahvra, himba si os nunglivav novnamba. ³¹Tanam kava yemba ishunv, ovna pethanamba si umharavhoavav, heva os kana moamba si wohlohvav.

Yesusva Unna, Aramba Hevhoangas Nonorava Av, Ombolna Prolmba.

Matiu 24:36-44

³²Wo Yesus henga unna, kava si homba petharamba henga provav, wo indhanamba tit viv honamba, oi henanam si Yesusva provav? Owai, Sesoana ovsongolnindva eva tit vivta, kavpa eva tit vevta, Sesoangas kanarangas nonorava av. ³³Yimba eva tit vivta, wo noinda yeoa undundna aevvm.

³⁴Men kava olhmona ov, os indhanarini hevna denwitm os vevav, indhanamba unvav, kana denwitmoa hui lengwol vewuvm kavnasiraoa. Mongo no andra, mongo no andra os unvav. Wo galmba verava, mongom no andranindrinim omnavav, denwitmoa kanamo a kekalvho vro, henga kava si prorava, wo daha henga yeoa kamo a kavna denwitoa os wuleihamno.

³⁵Doa Yesusva olhmomba wuleiha, wo henga hevtindim unna, hona olhmomba yeoa keknam wuleivvm, wo undundna aevvm, yimba tit viv, henanam kava hengava si provav. Kava si ambo kuimbsuwenamgava pihavav, ora simolnam, ora okomba vohanam, ora sinim. ³⁶Manam yemba gimus vivav, wo kava si mura prolmba vevrava, yimba kamba nunglivavmoa. ³⁷Yemba men kava ishunv, wo eva indhanamba indkumbimba kava os ishunvta, yeoa undundna vivm kanasiraoa.

Ungevlirini Yesusm Wel Sandana Kuval Sovhomnana.

Matiu 26:1-5, Luk 22:1-2, Yon 11:45-53

14 ¹Wo sembayang andranindna kuwul eva katekis kusonamba, hev m ishue, es pivva si Yesusmba poaitava kevrirava, helvakomandhalm? Hev ningna, sambla simba elohv, wo indkumbiva kusovav, wo innemba hlavav huiva Yerusalemrava, nomba innemba ova hlavav, ningvra, Sesoava simbehumunilmba seilva wonphona Isip petharini. Nonamba rotiva hlavav yishui. ²Wo no kuwulva ishuvna hev m, aembu, manam pimba Yesusva hona innenindna novrava kevrivav, wo

buiram waianga, pimba ora muserava kevrira, wo pimba himba helvowol vivav. Poaita ambo kevrivav.

Mongo Ungevlirini Welsanda Yesusna Kura Sovhona Novnovhora.

Matiu 26:6-13, Yon 12:1-8

³Wo nonamba Yesusva mongona deuvra avna Simonina, no deuvpa Betani kembella, no Simonmba doara lombamungil anamba, doara selpuemnana. Wo inne di ona wonnawona, mongo ungevlirini botel sanda wulprona, botelva nomba besal hevm, no sandava teihnungva besal hevm vevna, diva os lohmanavna i. Wulpronamba, kewul powalnamba, doa Yesusna kura sovho, osm vevna, Yutanind ten indhana mindilm sovhowol vinvnam, os singvi.

⁴Wo nonamba monglava no indhanamba musk vivna, hevm ishuvna, esm hevpa himba hona sandava ombamba sovhov? ⁵Hona sandava pimba doarava maketramba wulangatava, pimba diva eva ata os dumbtami mindnam, os 300 kinara phota, wo innehuinindm moang vi. Wo noinda no ungevlirinimba okusv vina.

⁶Doa Yesus unna, manam yimba okusvvav, sahokla ovriv, ⁷mani sahokla veima, kam memba undnahonam beswonam vrei. Yimba innehuinindmmba moang velm vinrava, viu, men euvmona velvohvm. Heva os kava owai, mani yemba kava mongawulm si wohwonamana vevavma, osva yimba kamba si vruwuvmona vevav, owai. ⁸Wo hona ungevliriniva memba kamba sandanamba sovholothomniva, memba osm kamba vemni, yimba si os kamba vinivav mindilva. Mongova monamba lohvmoa, kamba okolalmba.

⁹Tanam kava yemba ishunv, kanamba moamba honamba besal si os hellenguamana vethavav indakonda petharava, wo hona ungevliriniva memba veiva, si eva henamba osta hellenguamana vethavavta, wo indhanamba si beswonam hembra ningminiv, besal.

Yutasva Yesusmba Indthueinilm Vevna Ungundmba.

Matiu 26:14-16, Luk 22:3-6

¹⁰Doa nonamba mongova hevtindirini gana, nihilva Yutas Iskariot. Ganamba, himba sembayang andranindna kuwulm moam ishomnalm geinna, unna, ka yemba si indthueinvav, osva men Yesusva, wo yimba nonamba si kevrirava, buiram waianga, os pev men ningminivm. ¹¹Wo kuwulva hillinamba, indk vithivna, umnina, yemba kava si di dembrehuvav. Wo doa Yutasva nengvna, henanam si kava indthueinvav, osva Yesusva men?

Yesus Hevtindim Tihm Wonnelm Velm Vevna Pasova Tihm.

Matiu 26:17-25, Luk 22:7-14 eva 22:21-23, Yon 13:21-30

¹²Wo rotiva yishuiva nonamba hlavnamba, nengewuvna, Sesoava tomonalmba seilva wonphona Isip petharini, wo sipsip miklewol

vivnamba, wehla ve. Doa nonamba Yesustindiva Yesusm umnina, yimba es nengv, ata kava heni deuvram angavav, no sipsipna nihilva huhul velmba, wo pimba hla? ¹³Wo hev samblindhanam unna, Yerusalemram dem esihoho, wo diva yimba monarava mongova tendorinimba ata anongla evevav, no tendoriniva po guavav, hem ehengpethota. ¹⁴Wo ata himba mongona deuvram gavav, doa yeoa sis enggo, wo no deuvna aralm ohosahmano, pina guruva os oi, yimba kamarva venamba mendekliva, hi lohv, no kamarrava kava ata no sipsipna nihilm woniprovav wonnelmba?

¹⁵Wo no deuvna aral yemba ata wonvongavav no kamarram mendekliram. No kamarva sena lohv, wo tikarva manimani os nalohv, ata pimba lehra hlawuvav, wo yeoa di meilna eveota no kamarra. ¹⁶Doa no hevtindirini samblava mi enga Yerusalemram, wo osoa enonglana, ten Yesus hev ishunnam, wo di innemba meilna evenata.

¹⁷Doa simba okilvrvnamba, Yesusva no deuvrava wonphovna, ¹⁸doa hevtindim 12pelaram mongawulm wonnawovnamba, doa Yesus unna, yemba kava tanam unv, mongo yerini kamba ata unguindmba indthueinvav, honi yerini men piv mongawulm hlavm. ¹⁹Wo undva henamba potra pihengu vinvna, hevm os ningwul vevna, an hevpa dihi, wo henoi henoi ovna, kamma, owai? ²⁰Wo Yesus henga unna, men kava yem mongawulm wonnevnm mongawa sospanda, pev honi ambo ata.

²¹Kava arana ombol lohv, wo doara doa tombairava novol vina, kamba si helvakomandhivav, wo kamba si osva dahavavta, tenovol vinam. Heva os himba nomba yeriniva kamba ata unguindmba indthueinvavpa, heva hevm umniv wavro. Manara, noinda si hembra sesmba sewonam kinwonda plothomnavav, wo nihsesoava venavav os i. Himba si os ovav, mani avamba kamba osm lengnama?

Yesusva Rotina Wainna Dahwol Vevna Hevtindim.

Matiu 26:26-30, Luk 22:15-20, 1 Korin 11:23-25

²²Doa mendahva wonnevnmamba, Yesus hev rotiva vranamba, wo Sesoam ishovongo venana, lehra yimba kamba dembrahuni, wo rotiva nomba popowol venamba, doa pavmong vine hevtindim, wo unna, dumbu, hla, kana nihil memba. ²³Wo wain eva mokna vra, Sesoam henga ishovongo venana, lehra yimba, wo unna, hlao, doa ambo mongawa mokna hlana. ²⁴Wo Yesus unna, hona wainmamba memba kana tovol. Doa tanam kamba ata dahavav, wo kana tovolva ata os sovhopevav, indhanamba mindnam kolvrowolalmba. Osm yimba liheivav, Sesoam tanam ishuvv hevtindimba.

²⁵Doa tanam kava yemba unv, hengava wainmamba kava si nevavmoa, verava kava si sewonam wainmamba nemelva nevav di Sesoainda.

²⁶Wo wonnepianamba, Sesoam sangal wonsevrarnanamba, wo nominiva wongana, henga indhanahuiram wonganamba oloram, no olomba os ningthiv oliv denwit.

Yesusva Pitam Omnana, Ata Yimba Unvav, Yesusm Kava Tit Vrev.
Matiu 26:31-35, Luk 22:31-34, Yon 13:36-38

²⁷Wo Yesus unna, ata yimba kanaminiva pem bukethavav, kana ungundnapenam, os doarava Sesoana moashulnindriniva tombairava novol vena,

Seso sipsipna kekalvhonindrinimba si helvakomandhavav, wo noinda sipsippa pem bukethungu vevav. *Sekaraia 13:7*

²⁸Doa Yesus henga unna, osta detiva ata phovav, heva os henga si kava beswonam pokamariniva phovav, wo kasna si miva yemba desumbi gavav Galili provinsramba. ²⁹Wo Pita omnana, owai, yetindiva indkumbiva pemba angatava, kava owai.

³⁰Doa Yesus Pitam omnana, tanam hona sinimba ata yimba os ovav, kava Yesusmba tit vrev. Ata honamba moamba samblamongolm opiwol vevav yimba, wo ayamba samblalm mendah opiwol vre. ³¹Wo Pita mindnam henga omnana, owai, pimoa mongawulm endahowolla, heva os kava osva ovavmoa, kava Yesusmba tit vrev, wo hevtindiva indkumbiva osangas umninata.

Yesus Sesoam Sembayang Vawona, Kana Kinwonda Nengas Pipahamno.
Matiu 26:36-46, Luk 22:39-46

³²Wo nominiva wonganamba, Getsemani pethara wonpho indhanahaira, wo Yesus unna hevtindim, yeoa hui aevvm, kava ata dem gavav, Sesoam sembayang venalm. ³³Doa Yesusva Pitam Yemsm Yonm nomangas demba wongana, wo hevpa di duuskumbi vevna, ata kamba kinkumbi plothomnavav, kamba helvakomandhivav. ³⁴Wo himba no samblamongolm ishunna, kamba kinkumbi venav, kamba ata daipota hui dahavmi, kavvei. Yeoa hui aevulvm, novkaka aevvm, kava dem gav.

³⁵Doa hev espeta ganamba, pethara plakope duusnahonam, daikaka vungavna, wo os Sesoam aralm sahvungo venana, es hevpa honamba kinkumbi kamba plothomnavna, lehra ye nengas pipahamnav, ³⁶wo heva os kana moarava manam yimba nengas pipahamnavav, owai, pevna nengavngangna ambo veo, ora owai.

³⁷Wo henga ona prona, pai, samblamongova ninshav, wo Simon Pitam omnana, Simon, manam yimba liv? Espetava yimba novkakava avnamoa kanisrava. ³⁸Yeo novkaka aevu, wo Sesoam osahuwuvmonavm, ata homeis yem plel vevm hona kinda. Tanam yimba kam engpetvolm vev, heva os owai, yemba gimus vinv.

³⁹Doa Yesusva hengava espetava ganamba, Sesoam osahmana, os doara hev ten seilm osahmananam, ⁴⁰wo henga engilpranamba, ona, pai, ninshav, henga nitata vinvnamba. Wo Yesusva sah owol vevnamba, himba lous vrvina, moamba sesva ishomnalva.

⁴¹Doa henga ganamba, henga Sesoam osahmanana, wo henga engilpranamba, nongalna, mendah ninshav. Wo unna, mendah yimba shaolavma, doata. Kava arana ombol lohv, heva os ata kamba sehsimbihal indthueinvav indhanakoklam. ⁴²Pulvo, nunglu, no sehsimbihalva doa proi, kamba indthoalmba.

Yutasva Yesusm Ungundna Englisra Holvonithinna.

Matiu 26:47-56, Luk 22:47-53, Yon 18:3-12

⁴³Doa Yesus mendah wonishovna, wo Yutas phona, no Yutasva mongo hetindirini. Himba desumbi provna, wo indkumbi noinda pelkleihamna, ovlatega himba iambvna. No indkumbiva himba os ambna Yutanindna kuwulna moara, katekis, sembayang andranindna kuwul, mundil, honamba kuwulva wolanga vina hembra. ⁴⁴Wo Yutas doara no kuwulm ishunna, ata kava garava, hemangas mapotho ovre, pev u, ten Yesusvata, nom kava kevrallmba ambv, wo os wohkekel viuta, waianga, wo novnovhora waiangavm.

⁴⁵Doa Yutas pronamba, omnana, guru, doa Yesusm mehtat vene, osm vena mapotho ovre. ⁴⁶Doa noi indkumbi prapianamba, Yesusm kekel vi. ⁴⁷Doa mongo hevtindirini phonamba, ovla hevna selvoramnanamba, mongo no andranindrinina angol singeitpipahamna, no andranindriniva tempelna kuwulna andranindrini.

⁴⁸Doa Yesus unna, mani kava daosnindrini avnama, noinda yimba ovlana tanganamba wulprapiavna, kamba helvalmba? ⁴⁹Elsus kava no tempelduvrava indhanamoserava wonamana vevna, wo owai, yimba nonamba kamba kevrivnamao diva. Wo os doara Sesoana moashulnindrini tombaira novol vena, osva noinda yimba kamba wohvenalm vinivta.

⁵⁰Doa nonamba hevtindiva pem bukethana, wo Yesusva hevho ungunndna englisra lohvna. ⁵¹Wo mongo tuendisrini kayenpetava ambo vethanamba, wo Yesusm sis engpetha novolm, wo ungunndva nunglinamba, ona, mongo hetindirini, wo ona kevrina. ⁵²Heva os owai, kayenmangas himba kevrinmina, hevova snilung nihps wohgana.

Yutanindna Kuwul Yesusna Plalm Aslalvna.

Matiu 26:57-68, Luk 22:54-55 eva 22:63-71, Yon 18:13-14 eva 18:19-24

⁵³Doa Yesusmba waianganamba, tempelna mendekli kuwulinda di waipulvo, di Yutanindna kuwul indkumbi kusovnam, tempelnindna kuwul, mundil, katekis, honi kusovna diva. ⁵⁴Wo Pitava sis engilguavna, wowonam ambo gavna. Venamba, siha pueilmerna no kuwulna deuvpethalla, wo suwera pathavhueinna, poaita ambo avho kekalvhonindmongo.

⁵⁵Doa noi kuwul di moakumbi wuleindavna Yesusm, osm aslalmanavna, manamoara, mani venamba, noinda pimba ata duangm

umnivav, helvakomandho? Heva os owai, aslalloh venamba. ⁵⁶Wo indhanamba mindnam diva lovahvna, dasalm ambo umnivna, Yesusva os vena, heva os owai, mongawamomba ishuvnamoa, indakondamoa ambo eishu vruwul avna. ⁵⁷Wo mongla no indhana opulvonamba, umnina, ⁵⁸kava os hillina, os Yesusva ona, si kava tempelduvpa taka vindava, nomba indhanamba temba dembrinamba huiwa Yerusalemrava, wo mongo tempelduvpa henga kava si vevav, samblamongo okombanam vevav, no tempelva indhanamba vivavmoa, ambo kava kavho vevav. ⁵⁹Heva os gekala ambo olvohvna, mongawamomba tanamba ishuvnamoa.

⁶⁰Wo noi sembayang andranindna kuwul hev hovra lohvhonamba, Yesusm sah ovre, es eva ata yimba ishovav hona wetatmomba yemba memba umniva? Yimba moamba sesva wulluhunvmi owaimi? ⁶¹Doa Yesusva moanghui ambo lohvena, moapetava ova sevrnamoa. Wo himba henga sah ovri, es hevpa yimba Kristusma? Sesoa yem men puvundthoanam, osm kam Yutanindm kolvrowol velm? Yimba Sesoana ombol tanam ambo lohvmi owaimi, nomba temba pimba hembra okuliv?

⁶²Doa Yesus ona, evasalm ka honita. Kava arana ombol lohv, wo yimba si kamba henga nunglutithueivav, kava si Sesoa mendeklina nihanasis avav, temba keknamangas lohvpa. Doa nomini henga si hona petharam kava provav, wo nonamba yimba kamba si os nunglutithueivav, kava tekohovra si pihavav.

⁶³Doa tempelna kuwulm wusprovna Yesusna moara, wo noinda hevna malom powale, ona pimba doa Yesusnamba moamba hilli, manam mongmomba indhananamba hillinvav, owai. ⁶⁴Sesoamba himba doa sahokla ovrei, oi, kava Kristus, Sesoi lohohra kava elohv. Es hevpa yimba ningv? Es hevpa pimba vinivav hona indhanarinimba?

Wo kuwulva nomba indkumbi mongawamomba mindnam hevm ishuvna, ambo duangm wohtivra helvakomandhalm. ⁶⁵Doa monglava muembkosvna wehlavna, wo monglava novlomosm kayenna ehlihithiminivna, wo ohilvivna, dasalm umnivna, an yemba helvav, sevro, yimba nonoanindrini lohvtava. Wo kekalvhonindva kevrinamba, englabambna sang pulavna, helvuwul vevna.

Pita Ona, Yesusva Kava Tit Vrev.

Matiu 26:69-75, Luk 22:56-62, Yon 18:15-18 eva 18:25-27

⁶⁶Wo Pitava mendah di suwera deuvpethalla avna, doa mongo ungevlirini phona, kuwulna andranindunguvlirini, ⁶⁷Pitam nongla, wo muram suweram pronamba, liha, wo ona, yimba Yesustindirini men Nasaretrini.

⁶⁸Wo Pita omnana, es yimba ov, kava tit vev. Wo nominiva Pitava gana, ona tuvra pholm, wo lilnam ayamba ophona. ⁶⁹Wo henga nomba

ungevlirini nonglana, wo nom indhanam unna, ten deuvpethalla aevvnam, os hona tendoriniva memba Yesustindirini, ⁷⁰wo henga Pita ona, owainonoa. Wo dawonam no indhanamba umnina, tanamta yimba esm osalv, yimba Yesustindirinita, manara nengara yimba Galili provinsrini, moamba yenamba indanampeta.

⁷¹Doa Pita unna, kava tanamolnam ov, kava gekalava otava, ata Sesoava kamba sahokla vrevav. Kava tit vrev, hembra nomba yimba temba umnivpa. ⁷²Wo nonamba Pitava ona ishollohna, ayam opho, seilm ophoi, eva men henga ophov. Doa Pitava nengna, Yesusva honam kamba doarava ishomnana, os honi sinimba yimba ata penahonam samblamongolm osalwolvav, Yesusva kava tit vrev. Wo yimba osva ata ishopiarava, doa ayamba ata henga ophovav. Doa Pita duuskumbi venavna, wo mindnam wo ve.

Yesusm Duangindam Ningulangana.

Matiu 27:1-2 eva 27:11-14, Luk 23:1-5, Yon 18:28-38

15 ¹Wo lingil lihavnamba, no Yutanindna kuwul indkumbiva moapetava henga ishuvna, ata es hevpa vinivav Yesusmba? Wo moamba ishopieinamba, ata os vinivav, wo polisi Yesusmba saongna ningina, wo ningulanga Pailat duangindam. ²Doa di henga Pailat sah ovre, es hevpa yimba kuwul mendekli wulluhunvma Yutanindna? Doa Yesus ona, ten ye oimta. ³Wo no kuwul, ten doara hev kevrinam, noi osva moangakala ovrvina, Yesusva os vevnata, osm Pailatm dasalm ovrvina. Os ningvna, Pailatva ata Yesusmba helvakomandhavav kana moara. ⁴Wo Pailatva henga Yesusm omnana, yemba ambo mindnam indkokla ovrviv, es yimba ata sesva ishunvav? ⁵Wo Yesusva moamba hengava ishonamoa. Doa noinda Pailatva os nengaloh vevnamba, pai, hona indhanariniva es hevpa?

Pailatva Wohtna, Yesusmba Lepethalm.

Matiu 27:15-26, Luk 23:13-25, Yon 18:38–19:16

⁶Wo Pailat duangna wevsa os lohmanavna, Yutanindva no innemba mendekliva hlawuvnamba no tahonnam no tahonnam os hlawuvna, wo mongasal buinindrinim wolapho vavovna Yutanindna moara. ⁷Wo nonamba mongova indhanariniva buimera livna, nihilva Barapas, wo himba daosnindm engalpethanamba, duangna valgonindm engvapingilm vevna, wo indhanamba helvakomo vivnamba, noinda bui vina. ⁸Doa Yutanind mindnam prapianamba, Pailatm sah ovri, kam os vinu, mepev doara velohvm, mongongalm buimerinim wolaihapho.

⁹⁻¹⁰Wo Pailat nengna, honi indhanamba Yesusmba musk vinivmoa, kuwulangas hev Yesusmba muembnavho vrviv, wo noinda Pailat unna, es yimba ningv, Yesusm kava wolaihaphovavma, men yena kuwul

wulluhunvm? ¹¹Doa sembayang andranindna kuwulva di mura lovahvna, no moamba hillinnamba, wo ombandhanam otuhtina, osm mindnam Pailatm umnira, os Barapasmoa wolaihapho, Yesusva owai.

¹²Wo henga Pailat osah owol ve, es ata kava eva venavav Yesusmba, memba ova yimba ningthivpa, Yutanindna kuwul? ¹³Doa he di mindnam umnina, pakona hemoa tira krusera lepetheiu.

¹⁴Doa Pailat henga unna, owai, heva os mana vemakoklava venamo. Wo henga he di mindnam umnina, pakona lepetheiu krusera. ¹⁵Wo Pailatva hena moamba hillinnamba, wo Barapasm wolaihinginna, doa Yesusm hevna valgonindindam wolaihangavna, wo valgonindva ambo esvema di Yesusmba hilvi wepondanasna. Doa Pailat hevna valgonindm unna, pakonaoa daha os lepetheiu.

Valgonindva Yesusm Dasalm Moari Ovruwuvna.

Matiu 27:27-31, Yon 19:2-3

¹⁶Doa valgonindva Yesusmba waianganamba Pailatduangna pueilmera, wo indkumbim valgonindm nembapho vi, nonglalm. ¹⁷Wo Yesusmba kayen aambul vithimninamba, wo topilm wesel nasna weilvrinnina, wo kura weilholothumnine Yesusm, dasalm ambo osm ora memba kuwul.

¹⁸Doa Yesusm dasalm ambo moari ovruwuvna, yimba Yutanindna kuwul a? ¹⁹Wo tengana koval hevri, wo muembksvna wehla, wo dasalm mulumbdandna ambo lovahthamnavna, os kuwulm ten vewol vinivm. ²⁰Wo ova moari vepiemninamba, wo kayen aambulva henga selvoreimnivna, hevna henga vithimnivna, wo Yesusmba waianga, kruseram lepethalm.

Valgonindva Yesusm Krusera Pakona Lepetheina.

Matiu 27:32-44, Luk 23:26-43, Yon 19:17-27

²¹Wo Yesusmba monara waiangavna, mongo indhanariniva provna monam, nihilva Simon, oklamini himba provna, wo Yerusalemram pholm vevna, no Simonmba Aleksandaina Rupusina aral, wo Sairini kotanindrini. Doa valgonind umnina, Yesusna kruseoa pungao. ²²Wo Yesusmba dem waipulvo, nomba os ningthiv Golkota nomba olomba, osm ovna, oi indhanana kukel.

²³Wo Yesusm wainmba daholm vivna, no wainmba obatnahonam moakot vinamba, osm daholm vivna, ata humeis nihsesoa venavm, heva os owai, Yesusva nenamo. ²⁴Doa pakona kruserava hevpa lepetheinamba. Wo Yesusna malova dumbnamba, doa pilai win vivna, osm hevma moang viwul vina mongom mongom.

²⁵Wo Yesusmba nonamba krusera simolnam lepetheivnamba, dihi os yamba 9pelara vevna. ²⁶Wo valgonindva nomba hevna volm vina, wo krusesra sena os moapeta tombaira kleihina, osm hona moara lepetheie, wo os moapetava kleihina,

MEMBA YESUS, YUTANINDNA KUWUL.

²⁷⁻²⁸ Doa indhanarini samblava di Yesusinda murapeta krusera lepehiwulna, nombra indhanarini samblava helvakomonindrini sambla, lepehiwulna noinda. Mongova sihanasis eva mongova nihanasis, os lepehiwulna. ²⁹ Doa indhanamba di monarava kohawovnamba, wo Yesusm nonglavol ovovna, loskas ovrakov ovrivna, ye honi kana tempelduvpa Yerusalemrinimba taka velva olohvnama, wo ovna, kava henga si samblamongo okombanam ambo dembravav? ³⁰ Pev doara ten indhanam wolapho vevnam, eva os pevmoa wuleihota, kruserinioa holopeo.

³¹ Doa no Yutanindna kuwul indkumbi os hevma moarialm ishune, pim wolapho velm prona hona pethara, heva os hevpa owai, kruserinimba holopevmoa. ³² Ai Sesoa yemba tanamba doarava puvundthoatava, wo tanam yimba kana kuwul wulluhunvtava, wo daipotaoa kruserinioa os eva holopeota, wo yemba kava undnahonam lovahthamnavav, tanam lehra lohv. Wo no daosnindrini samblava hevna kruse pethalliniva eva ohokosv venata Yesusmba.

Yesusmba Os Wohvitivoana.

Matiu 27:45-56, Luk 23:44-49, Yon 19:28-30

³³ Wo okombava hovrava lohvnamba, doa heva os simsna okilvra, venamba, okomba vohanam yam 3pelara vena. ³⁴ Doa nonamba Yesus hevnamona kinge o, os eloi eloi lama sapaktani, osm ovna, kana Sesoa, kana Sesoa, manara yimba kamba nunglulihai?

³⁵ Doa mura mongova di hillilvahvna no moamba, wo os una, pai, hillu, Yesusva Elaitam wunuhomnav, ten doara heva amana venam. ³⁶ Doa mongo indhanarini lelnam ganamba, lembatamsna vranamba, wainpolla velthanamba, wo tenglara lothonamba, wo Yesusm mengval nethavongovna mengutilm. Wo ona, piv dawonam nunglul lovahv, ata Elaita provmi, wolaihapihavmi owaimi? ³⁷ Doa Yesusva eunillam kinge onamba mindnam, wo wohdaha.

³⁸ Doa wohdahanamba, wo mana vema os phona tempelmera di Yerusalemra, wo kayenmba mendekliva merava tempelduvpa kleihalohvnamba, mongo tuvra diva kleihalohvnamba, wo heva hev ambo hovrahovra powalwolna. Os powalwolna dipeh, venamba dingoho. ³⁹ Doa Yesusva nonamba dahavnamba, wo mongo valgonindna kuwul nunglul lohvna, Yesusva hena novra wohdahana, wo hev ona, tanamolnam hona indhanariniva Sesoa ombolta.

⁴⁰ Wo eva mongova ungevliva okla lovahvna, nonglanga velvohvna. Honi lovahvna, Salome, Maria Maktalarini, Maria Yemsina Yosepina aval, no Yemsva boasalal lohvna. ⁴¹ No ungevliva doarava engpethalvohmana

vevna, Yesusva diva Galili provinsrava andra vevnamba, wo hetindim innemba dahwol velvohvna. Wo mongla ungevli mindnam di eva Yesusm nunglul lovahvna, ten Yesusm Galilirini Yerusalemram doara engambnam.

Yesusmindmba Honmera Singvina.

Matiu 27:57-61, Luk 23:50-55, Yon 19:38-42

⁴²⁻⁴³Okombava pelangalla avnamba, wo mongova Yutanindna kuwul provna, nihilva Yosep. Himba besal lohvna, Arimatia kembellini. Wo himba indva wulluhunvna, Sesoava si hevna nemeltindimba beswonam wonavav, wo himba nom nengaomana vevna.

Wo himba doara nengna, simba ata kilvravav, simerava temba vah iaevulvav. Wo es hevpa Yesusva mindilva vindkleihalohvav kruserava. Ambo os nengvna, ambo ka gavai, Pailat duangm osahmana, es hevpa Yesusmindmba kava ata detiva singvivavma? Wo pepehtovpa piengana, ambo nis ganamba, Pailatm osahmanana. ⁴⁴Wo himba hellenamba, ona pai, es hevpa Yesusmba lelnamba dahai? Wo wunuhomna valgonindna kuwul, noi wulluhunvnam, wo sah ovre, es hevpa Yesusva doa dahaimi, owaimi?

⁴⁵Wo no valgonindna kuwul omnana, doa dahaita, wo noinda Pailat Yosepm omnana, wouta gao, vindpipahota, wo singviu pokamara.

⁴⁶Wo Yoseppa ganamba, kayen dombal nemel sovakanamba, wulpro, Yesusm kruserini vindpipaha, no kayenna ningenamba, honmera yitha, no melva doara hina indhana hev. Doa hon mendekli vaval umharavho vrunganamba, no melva ehlatha. ⁴⁷Wo Maria Maktalarinii, Maria Yosepna avali, himba nonamba di nunglul elohvna, Yoseppa Yesusmindmba honmerava vindithavnamba, ona nolhra ten.

Yesusva Henga Beswonam Phona.

Matiu 28:1-8, Luk 24:1-12, Yon 20:1-10

16 ¹Sapturava vepieinamba, doa no sinimta ambo Salome, Maria Maktalarini, Maria Yemsna aval, hona ungevli samblamongo anganamba, welsanda sovawol vehalvna. Nomba wel sandava besal hev m teihnungva vevna, wo no welva Yesusmindm pokamaram selvolm iangalm vevna. Yutanindna wevsana himba iangavna. ²Minguram okombava bonamostava vevnamba, dem anga pokamaram, ³wo olongovnamba, hev m ishune, an pimba ata kollombvav, honmba nomba pokamarinimba velavhoalmba? No honmba mendekliva pokamariniva. ⁴Doa pokamarava diva pulvonamba, nunglina, pai, honmba doa ahnam umharavho vrulangai, melva os velaihalohv. No honmba mendekli. ⁵Doa mellava saivnamba, ona nunglina, pai, mongova tuendisriniva malo dombalna tokolna men av nihanasis, wo ungevli pamba os vivna i.

⁶Wo himba unna, yimba manapenam viv? Yimba Yesusm Nasaretrinim aslalalm ambei, ten krusera dahanam? Owai, huiva vindilvmoa, doa henga beswonam phoi. Nunglu, men honinda vindil liheinata, wo vindilvmoa. ⁷Doa henga angota, Pitam, mongla hevtindim os ishunu, doa Yesusva mi yemba desumbi gai Galili provinsram. Wo di si yimba hembra nonglapulvovav, os hev doara ten yem ishunnam.

⁸Doa ungevliva mindnam pem vivna, eiswol vevna, pokamarinimba vinamba, lelnam anga, pepehnahonam ambo angavna, monarava himba ishunvnamoa indhanamba.

Maria Maktalarini Yesusmba Nonglana.*

Matiu 28:9-10, Yon 20:11-18

⁹Wo nonamba Yesusva pokamarinimba simolnamba phonamba minguram, wo seilva himba Maria Maktalarinisnam ishokamnana, no Mariana nihmerini himba doara 7pelara tihsongomba engilpingu venanamba. Noinda nonglana, heoa kam lihara, kava beswonam lohv. ¹⁰Doa nonglanamba, Mariava silelguawol vevnamba, Yesustindim ishunilm. Wo himba mendah duus vinivna Yesusmindm, os wuo ovna. ¹¹Doa Mariava unna, Yesusva henga doa phoi, kava doa nonglai. Doa himba os ningvna, gekala ov.

Yesusna Aonghal Mahalnindrini Sambla Yesusmba Enonglana Monara.

Luk 24:13-35

¹²Doa Yesusva indanampeta nilhana, wo hevtindirini sambla himba mongona kembellam engavna oklapetam, wo hev engilpetha. Wo henga sism osva enengna, Yesus hev memba. ¹³Doa no samblava henga eprinnamba hevtindi indam, ihishune, kava Yesusva doa enonglai monara. Wo nomba ningvna, gekala ohov.

Yesusva Hevtindim Ishunvna.

Matiu 28:16-20, Luk 24:36-49, Yon 20:19-23

¹⁴Wo dawonam ambo mongawulm hevtindiva 11pelara avhoapronamba, inne hlavna, doa Yesus di heva hev ambo hovra phune, wo koasromb vevna, manaram yimba osva uvna, Yesusva phonamoa pokamarinimba? Monglava indhanamba yemba ishunvnamba, osva Yesusva doa kava nungli, wo yimba os ningvna, gekala uv, yimba undhui lovahvma? ¹⁵Yeo angawul veota, mongona kembellam, mongona kembellam hona petharaoa, wo kana nemelmoa besal wulvahmana vinu indkumbimoa.

*^(16:9-20) Nonoanindva os uv, Makva owai, honamba moapetava novol vewol venamoa. Mongo indhanarini novol vewol vena.

¹⁶Doa himba nomba kamba osva undnahonamba lovahthamnavrava, wo henomoa pona pusvu, hembra nomba Sesoava si lopshavav. Wo himba nomba kamba lovahthamnamba owai vevrava, Sesoava si hembra nomba os unvav, yenamba sahoklal luhunv.

¹⁷Doa himba nomba kamba keknamba lovahthamnavrava, himba nomba os vivra, tihsongova indhanana nihrinimba engilvra, kana nihilm os sevrivrava. Wo himba nomba moamba ishuvav, ten seilm tit vivnam, ishuvnamoa. Wo indhanamba nungeilvrava, uvra, Sesoanamini. ¹⁸Wo eva himba nomba os vivra, saiholava kevrivra, wo mana emamba sahoklalva hlavra, wo noindava dalvramoa. Wo eva himba englana huhlinvra uvavulmungilmba, wo hembra nomba kanandhawol vevra.

Sesoava Yesusmba Waivongana Hevindam.

Luk 24:50-53, Aposel 1:9-11

¹⁹Doa Yesusva hev mendekli hona moamba ishopieinnamba, Seso waivongo hevindam, wo murapeta hevinda nihanasis desvhoana kuwul mendeklielm. ²⁰Wo hevtindiva bukethungu vena, wo no besalmoa Yesusna indkumbim isholvohmana vinvna, mongona kembella, mongona kembella. Wo mendekli hev poaouthowol vevna, wo himba mendekliandra vewol vivna. Wo noinda indkumbiva osva ningvna, Yesusmomba tanam.

Doata Makna Yesusmomba.